

MAGAHLANO A NAKO

 Ke nyaka bagatiši go swara ye nakwana feela pele le gatiša, ge le rata. Gomme mosong wo mobotse, bagwera. Ke a tshepa gore yo mongwe le yo mongwe o ikwela kgonthe... [Lefelo la go se be le selo godimo ga theipi—Mor.]

² Opela go gafela ga rena ga mehleng, *Ba Tlišeng Ka Gare*, yo mongwe le yo mongwe mmogo bjale, “Tlišang ba bannyane.”

Ba tlišeng ka gare, ba tlišeng ka gare,
Ba tlišeng ka gare go tšwa mabaleng a sebe;
Ba tlišeng ka gare, ba tlišeng ka gare,
Tlišang ba bannyane go Jesu.

³ Amene. A ga le nagane gore fao go na le selo se sengwe se sebose ka nnete ka lesea le lennyane la kgale? Moisa yo monnyane, bona ba bannyane, mahlo a go phadima a ntebeletše. Gomme go ne se sengwe ka bona e lego sa kgonthe, se sebose ka kgonthe. Gomme ba no ba baisa ba bannyane ba go hloka molato, ga ba tsebe selo ka dilo tša lefase. Modimo o file.

⁴ Gomme, le a tseba, go na le se sengwe ka ngwana, ka legaeng, se se tlemago legae mmogo. Go na le go tlema, ka ngwana. Bjale, ke duma ge nkabe re na le nako ye ntši go bolela ka—ka dilo tšeou, ka tše nnyane dilo, le ka dilo tša go fapania. Eupša rena, nako ya rena, re gatelela thata go nako.

⁵ Gomme re swanetše go ya thwi go Lentšu bjale. Go lokile, go bagatiši, ge ba rata go gatiša molaetsa mosong wo. Gomme a nke Modimo ka go huma a šegofatše yo mongwe le yo mongwe.

⁶ Bjale, lehono, ke a nagana ga go selo boka Lentšu, go balwa ga Lentšu la Modimo. Ke duma ge go ka be go le ka legaeng le lengwe le le lengwe, moo Lentšu la Modimo le bego le tla balwa. Gomme ke nyaka yo mongwe le yo mongwe wa lena, mosong wo, ge ka kgonagalo le ka kgona, le ge ba bannyane ba etla go tšwa go dikamora tša bona tša sekolo sa Lamorena, go no ba le tlhomphokgolo ka mo go kgonegago. Dulang le homotše, gomme le theetše ge ke leka, ka thušo ya Modimo, go tliša Molaaetša wo o filwego nna ka diiring tša thari bošegong bja go feta, bakeng sa kereke lehono.

⁷ Bjale, palo ya rena ya Lengwalo e hwetšwa ka go Joele 2, le Ditiro 2, Joele 2:28. Ka go Ditiro, re thoma ka 2:15. A ga go makatše, gore ka fao moprofeta yo, a bolelagoo, tema ya 2 ya Joele, le tema ya 2 ya Ditiro, “pula ya pele le ya morago,” Joele o boletše ka yona ka go tema ye ya go swana! Gobane go bolela go tšwa go Ditiro, tema ya 2, temana ya 15, le go theoga karolo ya Lengwalo, re bala se.

Gobane ba ga se ba tagwa, bjalo ka ge le nagana, go boneng ke eupša iri ya boraro ya letšatši.

Eupša se ke seo se boletšwego ke moprofeta Joele;

Gomme go tla tla go phethega ka matšatšing a mafelelo, go boletše Modimo, Ke tla tšollela ntle Moya wa ka godimo ga nama yohle:...barwa ba lena le barwedi ba lena ba tla profeta, ...masogana a lena a tla bona dipono, gomme go...ba bakgalabje ba tla lora ditoro:

Gomme godimo ga bahlanka ba ka le godimo ga balata ba ka Ke tla tšollela ntle matšatšing ao Moya wa ka; gomme ba tla profeta:

Gomme ke tla laetša matete ka magodimong godimo, le maswao ka lefaseng ka fase; madi, le mollo, le moyameetse a muši;

Letšatši le tla fetoga leswiswi, gomme ngwedi wa fetoga madi, pele ga letšatši le legolo lela la go šiiša la Morena le etla:

Gomme go tla tla go phethega, go re mang le mang a tla bitšago godimo Leina la Morena o tla phološwa.

A re ka inamiša dihlogo tša rena feela nakwana bakeng sa thapelo.

⁸ Wa rena yo botho, Tate wa Magodimong, bjalo ka lešela le legolo go kgabaganya moago wo mosong wo, hlogo ye nngwe le ye nngwe e eya tlase leroleng la lefase. Ka go kokobela re inamiša dihlogo tša rena le dipelo tša rena, ka Bogoneng bja Gago. Gomme re a rapela, Tate wa Magodimong, gore Moya wo Mokgethwa o tla tla bjale, go tsena ka go Lentšu, le go Le neela go pelo ye nngwe le ye nngwe feela bjalo ka ge Le dirile lefelo, le lefelo la marobalo. A nke Le tšweletše pele ga lekgolo. Modimo, re rapela gore basedumele, lehono, ba ke ba be badumedi. Le gore Bakriste ba tla tsea go swara go go swa, bao ba lapilego ka tseleng. A nke bakgethwa ba hlohleletšege, gomme a nke balwetši ba fole. Bolela, Tate. Gomme a nke re kopane go dikologa Lentšu la Gago feela bjale, ka gore re e kgopela Leineng la Morwa morategi wa Modimo, Jesu Kriste. Amene.

⁹ Thuto ya ka, mosong wo, ge re ka e bitša bjalo, e tla ba molaetša go kereke, ke: *Magahlano A Nako.*

¹⁰ Gomme ka mehla, ka matšatšing a a fetilego, mabaka ka mehla a tla mafelelong a wona, gomme re itia ma—ma magahlano. Go na le magahlano godimo ga tsela ya lephefo. Go na le magahlano godimo ga ditsela tše re di sepelago lefaseng le. Go na le magahlano godimo ga tsela ya lephefo ye kgolo ye re e sepelago go ya Letagong.

¹¹ Gomme, ka mehla, go tšeа mehlolo go bolela ka bokgonatšohle. Bokgonatšohle ke maatlaohle, gomme go tšeа

mohlolo wa go makatša go hlatsela bokgonatšohle. Gomme feela mohlolo o ka dira seo. Thuto ya Lentšu ke selo se sekaone kudu, gomme re...e a tla, "Tumelo e tla ka go kwa, gomme go kwa Lentšu," eupša ka mehla go tsea mohlolo go hlatsela gore mokgonatšohle o sa phela le go rena. Re swanetše go ba le mohlolo. Gomme ke a dumela gore Kereke bjale e eme mojakong wa tlthatsetšo ye kgolokgolo kudu ya bokgonatšohle lefase le kilego la bo tseba. Fao go bile...

¹² Ka go puruputšeng ga ka ga Lengwalo, lebaka la nakwana, ke hweditše magahlano a šupago a magolo ka go Lentšu la Modimo. Gomme šupa ke nomoro ya go felela ya Modimo. Re...O—O felela ka šupa. O šomile matšatši a tshela, gomme, la bošupa, o khutšitše. Lefase le phela ka go pušo ya lona godimo ga lefase mo, Kereke e katana lebaka la mengwaga ye dikete tše tshela, sa bošupa ke Mileniamo. Gomme tšohle dipalontshetshere tše (gomme) tša Beibebe di phethagetše.

¹³ Gomme Modimo ka mehla o mo nakong. Dinako tše dingwe gore re thari nthathana gannyane, goba (gannyane) go naganeng go fapano gannyane, eupša seo ka mehla se dirwa bakeng sa morero. Eupša Modimo ka mehla o nakong le Molaetša wa Gagwe.

¹⁴ Gomme kafao, lehono, ke a dumela gore re lebane le se sengwe se segolo seo Kereke e swanetšego go se tseba le go se kwešiša, gore re swanetše go tseba gore sohle se ke ka eng, le go se hwetša ka go Lentšu la Modimo. Ka gore ke a dumela, gore, ge—ge e se ka go Lentšu, ke no ba ke kamaka gannyane ka yona. Eupša ge Lentšu la Modimo le bolela ka yona, gona Modimo, ga go kgathale e ka bonala e hloka tirišano bjang go thuto ya rena, ke Modimo a šoma ntle Lentšu la Gagwe. Makga a mantši, go kgahlanong le tsela ya rena ya go nagana, goba mohlomongwe ka tsela ye re rutilwego go nagana, eupša re swanetše go lemoga bokgonatšohle bja Modimo ge bo dirwa pele ga rena.

¹⁵ Bjale a re yeng morago lebakana le lennyane, ka menaganong ya rena, le go ithuta, feela metsotso e se mekae, lebaka la mengwaga e se mekae ya go feta se se bego se direga. Ke a dumela, bjalo ka modiredi wa Ebangedi, gore re phela feela mo go tšweleleng ga kgauswi, ga lekga la bobedi, ga go Tla ga Morena Jesu; go boa la bobedi...goba go Tla la Bobedi. Lekga la mathomo, O tlide bjalo ka lesea. Nako ye, O tla bjalo ka Kgoši ya Letago, go tsea tefeletšo godimo ga bohole ba ba sa obamelego Lentšu la Modimo.

¹⁶ Gomme re a dumela, le tlhakanantswiki ye kgolo yeo re phelago ka go yona, lehono, ge re lebelela go dikologa go seatla se sengwe le se sengwe, le go topa dikuranta, le go no šimalala, le go tlogela go emaema ga rena ga letšatši le lengwe le le lengwe ga lebaka le la bogaswi, gomme ra lebelela ntle le go lebana le

dintlha, re a bona, ka godimo ga moriti ofe kapa ofe wa pelaelo, gore se sengwe se kgauswi le go direga.

¹⁷ Gomme ke a dumela gore Modimo, ga se nke, le neng, ga go selo sa mohlolo, goba ga go selo se kilego sa direga, ntle le ge Modimo a se akanyeditšepele ka Lentšu la Gagwe. A se utollotše, a se beile, gore banna ba ba šitwago go sepela ka go sona, ba kgone. . . ba tla swanela go ema pele ga Gagwe, gomme o be a swanetše go ba. . . go ema ntle le boitshwareletšo, ka gore Modimo o e dira e be pepeneneng kudu. Gore, ge monna a amega go lekanela ka yona, o tla e hwetša, ge o amega.

¹⁸ O ka se je sopho e na le ntšhi ka go yona. Aowa, mohlomphegi. O—o be o ka se ke. O be o ka se be. . . O be o tla boifa go ja dijo tše di bego di sa lebege feela gabotse, gomme di be di senyegile. Ka gore, le a tseba, e ka no go fa mpholo wa dijo goba se sengwe, gomme ya go bolaya ga nnyane nthathana. Gomme le šetša mmele wo. Eupša, soulo yela, o e dumelela go keteka ka dilo tša lefase, le le tsebago le senyegile le go kgona feela go dira selo se tee, go go tseela tshenyegong. Ga go kgathale gore o swara mmele wo gabotse bjang, le gore dijo tše botse gakaakang, le gore o phela gabotse bjang, o swanetše go ya leroleng la lefase. Eupša soulo yela e tla phela go ya go ile, felotsoko. Bokaone ke je sopho ya go tšhilafala go feta go tšhilafatša soulo ya ka ka dilo tša lefase, ka nako efe kapa efe.

¹⁹ Magahlano! Modimo, ka mehla, pele magahlano a magolo a a etla, goba go fela nako, moo A thomago se sengwe se seswa, magahlano le sa kgale, go se seswa, le lebaka le tee go le lengwe, ka mehla O bontšha pele Maatla a Gagwe. Motho, go kgabola mabaka, ka mehla o a thuba, le go ruta go fapoga, le go hlatholla go fapoga, le go ya kgole go tloga go Modimo wa kgonthe yo a phelago. Eupša, feela pele A gahlanya le go tsena lebaka le leswa, O tšwelela lefelotiragalo, ka maswao a mehlolo a magolo le matete. Ka mehla O e dirile.

²⁰ Lebelelang tshenyego ya pele ya lefase, magahlano a pele. Ka morago ga ge lefase le bopilwe, gomme Modimo o beile motho lefaseng, Beibele e boletše gore ba thoma go aga ditoropokgolo, mananeo a magolo a go aga a ile pele ka lefaseng.

²¹ Le lebelelang lehono. Jesu pepeneneng o rile, “Bjalo ka ge go bile ka matsatšing a Noage, go tla ba bjalo ka go Tleng ga Morwa wa motho.” Selo sa go swana.

²² Le ela hloko, ba be ba hweditše tsela ya go šoma ka koporo. Ba be ba hweditše tsela ya go šoma ka mphiri, le ka tshipi, feela pele ga tshenyu ya meetsefula.

²³ Lebelelang letšatši le re phelago ka go lona bjale, ka fao moago! Ba rile, “Batho ba atile godimo ga sefahlego sa lefase.” Lebelelang go dikologa ya rena. . . ebile le toropokgolo ye nnyane ya rena, gomme bapetša toropokgolo ye nnyane ye, mengwaga e se mekae ya go feta, ya dikete tše lesomenne, bjale e ka ba

dikete tše masomepedi šupa goba bontši. Ebile o ka se kgone go hwetša lefelo le gatee le legolo go lekanelo go tsoma mebutla godimo, gape. Gohle ke projeke ya ntlo. Yeo ke nnete. Moago! Go oketšega! Go oketšega!

²⁴ Gomme O rile, “Ge ba thoma go ata, gona sebe le bobe di a tsena.” Yeo ke ye nngwe ya dikota tše kgolo tša maswao, gore re bofelong bja tsela; le lengwe la maswao a magolo.

²⁵ Elang hloko, lebakeng la nako yeo, go be go le monna ka leina la Nimirode, yo a ilego ntle gomme a aga toropokgolo ye kgolo ya Babele, le go hlakanya ditoropokgolo tšohle tša mabapi, gore tšohle di tla kopana mmogo. Gomme go tla ba le toropokgolo e tee ye kgolo, gomme yeo e tla ba Babilonia. Le ka fao gore Modimo o nyaditše kopano yela ya lenaneo la lefase!

²⁶ E lebeleleng lehono, selo sa go swana. Mohlakanelwa wa bašomi, motho a itlemaganya bonabeng mmogo ka diyunione le ka—ka ditlemo tša go fapana, le ka kerekeleina. E di tatetša ka moka mmogo, e robaganya legora, e robaganya ko—ko kopanelo gare ga baena ba go fapana. Mohlakanelwa, wo mongwe wa maswao a magolo ao Modimo a a filego ka go tshenyego ya pele, re e bona e tšwelela fa ka go tshenyego ya mafelelo. Le a e bona?

²⁷ Elang hloko, gomme selo se sengwe se a se dirilego morago kua, re e etše hloko lebakeng la nako ya tlhakahlakano ye kgolo ye, ge pelo ya banna e thoma go gahla le kgole go tloga go Modimo, basadi ba bile modingwana wo mobjalo. “Ge barwa ba Modimo ba bone barwedi ba batho, gore ba be ba le ba babotse—ba ba botse,” ba eba lenaneo la thobalano.

²⁸ E lebeleleng lehono, se re phelago ka go sona. (E sego go bolela kgahlanong le basadi ba go hlomphega. Aowa, mohlomphegi. Ke bona didirišwa tša Modimo.) Eupsa bao ba sa itlhokomelego ka bobona; ka fao go nago le bontši kudu ka lehlakoreng la go fapana, go ya go rarela, “go nyala, go nyadiša.” Modimo o boletše bjalo, ka Beibeleng. Jesu o rile, “Pele ga nako ya Noage,” mo bofelong, “ba be ba nyala le go nyadiša.” Kafao tlhakahlakano ye kgolo e lego ka lefaseng lehono! Gomme re lemoga seo. Gomme selo se tee seo se hlotšego seo, Beibele e boletše gore meboya (meboya ye megolo) e theogetše tlase, meboya ye mebe, le go tsena ka go batho ba le go dira dilo tše. Gomme re bona meoya ya go swana ye mebe e šomago ka letšatšing la rena.

²⁹ Gomme bjale elang hloko gape, gore, e sego seo feela. Ge hele yohle e tlemologa, Legodimo lohle le a tlemologa, le lona. Ge lenaba le etla ka gare boka lefula, Moya wa Modimo o rotoša boemo kgahlanong le lona. Gomme maatla a mabedi a ka mehla a laetšwa magahlanong.

³⁰ Bjale, bjalo ka ge re bona gore nako yeo Nimirode a tlišitše go mohlakanelwa wohle mmogo, le go dira batho bohle go tla Babilonia le go tla ka go mohlakanelwa wo mogolo wo, le nako

ya bobe bjohle bo eya pele magareng ga basadi, ka thobalano, le go ya pele; ka nako ya go swana, Modimo o bile le hlatse mo lefaseng: Henoge, yo a sepetšego le Modimo, a se ne bosodi. Gomme ka nako ya go swana moo bobe bo bego bo tšwelela, barongwa ba tšweletše lefaseng. Diphedi tša barongwa tša sepelela ka gare go motho.

³¹ Sekai se sebotse kudu sa lehono, gape. Bjalo ka ge bobe bo tšwelela, le botse bo a tšwelela.

³² Gomme hlokamelang morago fale ka go letšatši lela le lebe, feela pele ga tshenyego, ge Modimo a bile le monna ntla a rera Ebangedi, monna wa go šokiša, monna wa go kokobela, e sego bontši kudu bja lefase, eupša monna yo a bilego le pelo go theeletša Modimo; Noage. Go be go le Noage le Henoge, ba rera, ka nako ya go swana.

³³ Gomme ge le ka ela hloko, godimo ka go Kutollo 11, e rile, “Ke tla fa maatla go dihlatse tša Ka tše pedi mo letšatšing la mafelelo,” dihlatse tše pedi gape mo letšatšing la mafelelo, Kutollo 11, “gomme ba tla dira maswao le matete magareng ga batho.”

³⁴ Lebelelang morago fale gona, bjalo ka ge Noage le Henoge ba be ba rera. Gomme Noage o be a rera molaetša woo o bonagetšego go gafa kudu go lefase. Gomme Noage . . . Še yona bjale. Noage o be a lokiša areka, a dira lefelo la polokego. Gomme woo e be e le mohlolo ka go wona mong. Ka fao gore monna, godimo ga naga ya go oma, moo meetse a sego a ke a tla, o be a lokišetša areka go phaphamala godimo ga lewatle le maatla le le bego le tla ba fale. Gomme ba re, “E be e etla fase go tšwa lefaufaung,” gomme e be e le kae? “Eupša ka tumelo,” e lego mohlolo ka bowona, “Noage, a seboditšwe ke Modimo, o lokišitše areka.” Le a e bona? Ga go kgathale e bonagetše bošilo gakaakang, e bonagetše bohlanya gakaakang, go batho; e be e le mohlolo, ka go wonamong, go bona monna a rothotha. Gore se sengwe se bonagetše bohlanya.

³⁵ E bušeleditšwe gape lehono. Ge motho a kokotela go Ebangedi ya Morena Jesu Kriste, a rera kolobetšo ya Moya wo Mokgethwa, go bea batho komana bakeng sa dikahlolo tše di tlago, goba kotse go tšwa go yona. Gomme batho ba sebjalebjale ba kereke ba sega le go dira metlae, le go re, “Ga go selo sa Lona. Gomme matšatši a mehlolo a fetile.” Ke mohlolo, lefelo la leswao magahlanong.

³⁶ Noage, a šoma, e sego feela gore o be a . . . dira mohlolo, goba lebelelang . . . O be a lebeletše, gape, bakeng sa mohlolo.

³⁷ Gomme Kereke lehono, bjalo ka ge e šoma ka tlase ga mošomo wa go rera Ebangedi, ka maswao le matete a latela, ba lokišetša mohlolo: Tlthatlogo ya Kereke, le go ya Gae. Go lokišetša batho, go hwetša sona seetša, go se lekanele go tšwa go dilo tša lefase, le go dira disoulo tša bona go dula ka Bogoneng bja Modimo, gore ge Jesu a bonagala lekga la bobedi,

ka letagong, bao ba loketšego ba tla hlatloša le go tšeelwa godimo mmogo, go Mo gahlanetša ka moyeng le go ba le Yena.

³⁸ “Bjalo ka ge go bile nakong ya Noage, go tla ba bjalo ka go Tleng ga Morwa wa motho; go ja, go nwa, go nyala, go fa lenyalong,” dilo tšeotšohle tše o di bonago di eya pele. Bulang godimo . . . Modimo a fe, lehono, gore le bule . . . Modimo o bula kwešišo ya lena, gore le kgone go bona tše ke dikota tše maswao. Gomme mehlolo ya kagodimogatlhago e lekeletše thwi pele ga rena lehono, ya go Tla la Bobedi ga Morena Jesu Kriste, gomme re magahlanong. Elang hloko.

³⁹ Gomme ge Noage a thoma go sebotša batho, le go rera, ba bantši ba bona ba mo segile, ba mo kwera, ka gobane molaetša wa gagwe o bonagetše go felela go lebaka.

⁴⁰ Gomme lehono, batho ba ka kgona bjang lehono . . . ge ba re, “Re na le dingaka tše kaonekaone lefaseng. Re na le dihlophana tše kaonekaone re kilego ra ba le tšona. Re na le tšohle *tše, tšeotšohle*. Gobaneng re ka hloka . . .”

⁴¹ Theetsang. Lehono, re hloka phodišo Kgethwa gampe go feta re kile ra e hloka. Gomme ge matšatši a tšwelapele, pele, le pele, go tla ba bjalo le bontši bo hlokwago. Gomme go tla tla go phethega, ka morago ga lebakana, gore ntłe le ge monna a swailwe ka Moya wo Mokgethwa, go thata go bolela, o ipeile yenamong go bulelwa go mehuta yohle ya dilo. “Se batamele e ka ba ofe wa bale ba ba nago le Leswao la Modimo phatleng ya bona, ge tšona dikotlo tše kgolokgolo di thoma go wa.” Re mo magahlanong, makopano a ditsela bjale.

⁴² Gomme ge re ela hloko, le go bona Noage, ka fao a ilego go dikologa, a sebotša batho, a re fao go be go etla pula. Batho ebile ba be ba sa tsebe se pula e bego e se ra. E be e sa nke ya ke ya na.

⁴³ Gomme go na le batho ka lefaseng, lehono, ka morago ga mengwaga ye dikete tše pedi tša theroy Ebangedi, ga ba tsebe go ra eng go tswalwa gape ka Moya wa Modimo. Ga ba tsebe se bomakgonatšohle bo se rago. Eng? Modimo ka go maatla a Gagwe a magolo a mokgonatšohle a ka kgonago go fetolela soulo go tloga go mo—mo modiradibe wa mokgotheng, go maemo a barongwa ka Mmušong wa Modimo, bjalo ka morwa le morwedi wa Modimo. Ga ba e kwešiše. Ba tšerwe kudu, ba tletše ka dilo tše lefase. Go phatsima, go gerema le lefase, gomme ga re lemoge gore woo ke moyawo mobe, le kota ye kgolo ya go swaya bakeng sa batho ba letšatši le, go šetša le go ba komana. Jesu o rile, “Ge dilo tše di thoma go tla go phethega, phagamišang hlogo ya lena, topollo ya lena e batamela kgauswi.”

⁴⁴ E sego seo feela, eupša Modimo o laeditše maswao ka Henoge, O laeditše maswao ka Noage, gomme lefase la e sega. Eupša, letšatši le lengwe, fao gwa tla modumo le legadima. Fao gwa tla mollo go tšwa legodimong. Legadima le medumo ya

thoma go rora. Woo e be e le mohlolo, ka go wonamong. Gomme pula ya thoma go wa.

⁴⁵ Eupsa mohlolo wo mogolo šo. Mohlolo e bile gore ka fao Modimo a bilego le ngwana wa Gagwe yo a dumelago a phuthilwe ka arekeng ya polokego. Nako yohle modumo o be o kgatlampana, pula e be e ewa, Noage o be a khutšitše ka arekeng le Modimo, o kgethetšwepele, o beetšwepele, go sepelela ka go areka yela. Ge dikotlo di be di ewa, Noage o be a khutšitše, ka polokego; yo a segilwego, o be a tsene ka khutšong.

⁴⁶ Bao ba ba segago le go dira metlae, lehono, ka gore o kganyoga go phela bophelo bjo bo neetšwego ka bottlalo go Morena Jesu, ga ba lemoge gore o tantšwe kgole ka tlase ga matsogo a Gagwe a go ya go ile. Ga ba lemoge gore o khutšitše feela ka go lotega ka mo o ka kgonago go ba, ka go Bokgonatšohle, gomme ga go selo se se ka kgonago go go gobatša.

⁴⁷ Areka ya thoma... meetse a thoma go tla, gomme batho ba thoma go goelela le go lla, le go goa le go tšwelapele. Gomme sebakeng sa areka e dutše fale, e phaphametše thwi ka godimo, nako yohle, e rwele Noage le go mo kobakobetša mmogo ka maphothong. Nnete. E be e le kota ya leswao. Modimo o swietše lefase go hlweka, la sebe. O be a eya go thoma le leswa. Maswao le matete a tšwelela pele A e dira.

⁴⁸ Elang hloko, go tleng ntle, ge Modimo a lokolotše Israele, yo a bego a le ditlemong, tlase ka Egepeta. Pele Modimo a retollela monwana o tee go Israele, selo sa pele A se dirilego e bile go dira leswao la kagodimogatlhago, go laetša gore O be a le Mokgonatšohle, gore O be a sa phela. Baprista le rabi, le go ya pele, ba letšatši lela, ba naganne gore Modimo o be a se sa le gona, feela boka ba dira lehono. Eupsa Modimo go le bjalo ke Mokgonatšohle, gomme O sa diragatša mohlolo. Gomme ba naganne gore O be a tšwile go beng gona. Eupsa thwi ka bogareng bjola bja nako, Modimo o tlide fase go la fase, lapa la go kokobela la Lefi, le go tliša pele morwa, e bego e le molokolli.

⁴⁹ Gomme ka fao Moshe yo monnyane yola a go potokwa ka arekeng ye. Ke duma ge nkabe re na le nako go ya ka go yona le go e hlatholla, ka fao ba mo išitšego ntle nokeng kua. Gomme fale, ka makgatheng a dikwena, le se sengwe le se sengwe gape, se dirile mohlolo.

⁵⁰ Ka fao A bolokilego Moshe, thwi mo nakong, ka fao gore ge ba naganne matsatši ohle a mehlolo a be a fetile. Eupsa ba be ba le magahlanong. Ba bile le Lentšu. Ba bile le marapo a Josefa. Bona ba be ba lokile. A be a le maswao, ee, gore Modimo o be a sa phela le go rena, gomme o be a le ka letšatšing le tee. Eupsa e sego seo feela, eupša go le bjalo, ntle le Lentšu, ba bile le Modimo mokgonatšohle Yo a sa kgonego go palelwa, Yo a

swanago maabane, lehono le go ya go ile, Yo a emego magareng ga bona bohle.

⁵¹ Gomme ka go lebaka la masomenne, ge Moshe a be a eme kgauswi le lehlakore la noka...goba lehlakore la leganata, Modimo o tlide fase ka sebopego sa Morongwa. Gomme Modimo, pele A senya Egepeta, gomme o gogetše bana ba Gagwe ntle le go fetola lebaka ka moka, O bonagetše lefaseng gomme o rometše Barongwa go bahloki le bahumanegi. O dirile maswao le matete. Gomme O laeditše Moshe Letago la Gagwe. Ka fao a kgonnego go tšea lepara le go dira mohlolo. Ka fao a kgonnego go bea diatla tša gagwe lehwafeng la gagwe le go se fodiša, ka lephera.

⁵² E be e le eng? Re na le nako ya go fetoga. Re na le ditsela tša magahlano. Gomme Modimo yo mogolo wa go se fetoge Yo a bego a le ka go—ka go...ke go se fetoge, Yo a dirilego dilo tšeо ka magahlano a nako, tše di fetilego, go kaakang bontši ka fao A tla dirago bjale ge hele yohle e bewa ka go pefelo gomme nako ya bofelo e fa! O a swana. Ga A šitwe. Mokgonatšohle o kopana le mohlolo. Ka kgonthe. Wa go se latišišege... Go nagana ga go se kwagale ga motho go ka se tsoge gwa kwešiša mohlolo wa go makatša. O swanetše go tla go kgomana le Bokgonatšohle. Gomme ka gona ge o dira seo, o kgohlagane le wa Kagodimogathago. Bophelo bja gago bo a fetoga, go nagana ga gago go a fetoga, monagano wa gago o a fetoga. O dirilwe go fapania. Malwetši a gago a timeleta. Maatla a Modimo a magolo a sepelela ka gare.

⁵³ Moshe, mo sethokgweng. O bone gomme o kwele Mokgonatšohle, gomme o bone mohlolo. Modimo o be a se a kgotsofala ka go fa Moshe molaetša feela, go ya tlase le go rera, a nnoši, go Baegepeta, le go rerela Baisraele. Modimo, Mokgonatšohle le Modimo wa mehlolo, o be a se mo—mo Modimo go no e utolla go motho o tee. Eupsa O rile, “Tšeа maswao a!” Haleluya! “Tšeа maswao a gomme o a laetše tlase kua. Ke tla ba le wena.”

⁵⁴ Phetogo! Magahlano a be a tlide; nako ya se sengwe go direga. Eupsa pele selo seo se direga, Modimo o fa tshebotšo ya Gagwe. “Ke sa le Jehofa. Ke sa phela. Gomme ke mokgonatšohle. Gomme ke nna Modimo wa mehlolo.”

⁵⁵ Gomme ge a eya tlase ka Egepeta, o tšere lepara la gagwe le go le lahlela fase, gomme a fodiša seatla sa gagwe ka lephera, gomme a dira dilo tšeо.

⁵⁶ Gona ke nyaka le hlokomele, nako ye nngwe le ye nngwe mohlolo o dirilwego, Sathanе ka mehla o fao go o ekišabofora. Gomme ge a be a ekiša bofora letšatšing lela, o sa le moekišabofora wa go swana lehono. Ebile le dikekišabofora tša gagwe di šupetša feela go bofelo bja nako mo bogahlanong.

⁵⁷ Ba be ba na le didupe tša kgale, le tlase kua, ka leina la Jannes le Jamboro, ba ba emeletšeego godimo. Gomme ba kgonne

go lahlela mapara a bona fase le go a fetolela go disephente, le go ya pele, le go dira feela boka yena, ba dirile. Eupša Modimo o hlatseditše Modimo e be e le mang. Ba kgonne go tliša dikotlo, eupša ga se ba kgone go dira phodišo Kgethwa, gobane Modimo a nnoši o kgona go fodiša. Gomme ba kgonne go tliša sešo, eupša ga se ba kgone go se tloša. Modimo o eme ka Maatleng a Gagwe fale, go bontšha gore phodišo Kgethwa ya kgonthe e be e le mohlolo wa Gagwe, go netefatša Bokgonatšohle mo tseleng ya magahlano.

⁵⁸ Baegepeta ba biditše dišo, eupša di ba tšwile bonabeng. Eupša mohlanka wa Modimo a ka kgona go di tloša. Gobaneng? Ba ka se kgone go ekišabofora.

⁵⁹ Re a rutwa, ka matšatšing a a mafelelo, gore go tla ba selo se se swanago. “Bjalo ka ge Jannes le Jamboro ba emelane le Moshe, kafao le ba ba tla ganetša Therešo; banna ba menagano ya go fapoga, mabapi le tumelo.” Ka fao ba tla dirago! “Hlogothata, menagano ya godimo; barati ba maipshino go feta Modimo; barobadikwano, basekgotsofale. Ba na le sebopego sa bomodimo.”

⁶⁰ Oo, ka fao letšatši le re phelago, tsela ya magahlano; mafelelong a tsela, mafelelong a lebaka! Modimo o a e netefatša. A letšatši le lebotsebotse go ka phela.

⁶¹ Modimo o netefaditše go bona, le go itlhatsela Yenamong, le go hwetsa letago. Ka fao gore O ile tlase kua ka Egepeta gomme a itia setšhaba! Ka fao gore O tlišitše Israele ntle godimo ga mafego a ntšhu, gomme o dirile maswao le matete, ka gore Ke Mokgonatšohle wa rena. Gomme O dira mehlolo.

⁶² Pele A nweletša dikoloi tša Farao, O file mohuta wo mongwe le wo mongwe wa leswao. O fa maswao a phodišo ye Kgethwa. O fa maswao le diponagalo tšohle tša maatla a Gagwe. O kgona bjang go phološa morwa mogolwane, goba go tšea morwa mogolwane. Ka fao A kgonago go senya, goba ka fao A kgonnego go phološa bophelo. Ka fao A kgonago go dira mehlolo. A ka kgona go dira mehlolo. Gomme ka fao letšatši le ngwedi di fetogilego leswiswi! Ka fao sefako se swietšego fase. Kafao legadima le swietšego godimo ga naga le go bolaya dikgomo, le go ya pele, feela boka le dirile matšatšing a Noage.

⁶³ Gomme O rile, “Ka matšatšing a mafelelo, ngwedi o tla šitwa go fa seetša sa gagwe, gomme letšatši le ka se phadime. Gomme o tla fetoga boso bjalo ka diaparo tša masaka; wa rotha boka madi,” ge a uta sefahlego sa gagwe le go lla, yenamong, le kudumela ntle marotholodi a madi a manyami. Modimo o tla ba lefaseng, Mokgonatšohle, a dira mehlolo. Nnête. A ka kgona. Ke mokgonatšohle. Naganang ka yona.

⁶⁴ Fale, tlase fale ka Egepeta, ka fao A dirilego maswao le matete ale, le dilo tše A di dirilego! Yena ke Modimo. Ga go yo a ka tšeago lefelo la Gagwe.

⁶⁵ Hlokamelang, Modimo o dirile mohlolo wa Gagwe, gomme O fa Farao sebaka. Gomme Farao o šitilwe le go gana go leka mahlatse a gagwe. Go be go se selo se šetšego.

⁶⁶ Ge motho a gana kgaogelo ya Modimo, go ne selo se tee feela se šetšego, seo ke kahlolo. Gomme, mogwera wa ka morategi, lehono, Modimo a re thuša, ge le bona bofelo bja sehlogo se bo etla, gomme ge o gana kgaogelo ye e go fago ka Jesu Kriste, Moya wo Mokgethwa, go ka se be le selo se šetšego eupša kahlolo Kgethwa. Go ka se be le selo se šetšego.

⁶⁷ Farao mafelelong o dirile sebe letšatšing la gagwe la mogau gomme fao go be go se selo se šetšego, ka gore magahlano a be a le kgauswi. Gomme Modimo o gahlantše nako.

⁶⁸ Ge Loto le Abraham, nako ye nngwe, ge Abraham a be a swanetše go ba mmuši wa lefase, peu ya gagwe e be e le go phatlalala godimo ga lefase. O be a na le Loto motlogolo wa gagwe le yena, yo e bego e le leloko.

⁶⁹ Gomme a seswantšho se sebotse lehono sa ya go tonya, ya go itlhophha kereke ya go hloka phapano; go ya go ya go tswalwa ke Moya, ya go kgethiwa, ya go biletšwa ntle, Kereke ya go aroganywa ya Modimo wa go phela. Ba dula mmogo ka go molala wa go swana.

⁷⁰ Eupša mafelelong go tlie nakong moo Loto a tšerego seholpha sa gagwe se segolo le go ya tlase ka Sodoma le Gomora, moo ba tla bago batsebalegi, moo ba tla tšeago kgetho ya naga. Gomme Abraham o dutše ka go thato ya Modimo gomme o tšere naga ya go hloka. Sarah, mosadimogatša wa gagwe yo mobotse, le Abraham, ba dutše go bahloki bja mobu, gore ba kgone go direla Morena.

⁷¹ Modimo ga a tshepiše malao a bonolo a matšoba. Le se akedišeng Mokriste. Gomme le se akedišeng Molaetša, ka go ba botša, gore, "Se sengwe le se sengwe se ya go loka. Ga se gona se yago go go kweša bohloko. Ga go na selo se yago go. Ga go meleko goba selo." Yeo ke phošo."

⁷² Bjalo ka ge moreti a rile, "A ke swanetše go rwalelwapele Legodimong godimo ga mpete wa matšoba wa bonolo, mola ba bangwe ba lwetše go thopa sefoka le go sesa go kgabola mawatle a madi?" Aowa, mohlomphegi.

⁷³ Modimo ga a tshepiše bonolo le katlego. Eupša O tshepiše mogau, go ema ka go nako ye nngwe le ye nngwe. Ke mogau wo re lebeletšego go wona.

⁷⁴ Abraham o kgethile tsela ya Modimo. O dutše godimo ga ntlhora ya thaba, go kgabola kua go be go se bjang bjo bontši go dikgomo tša gagwe. Eupša, Loto, sekai sa lefase la go kgelogha, kereke ye e sa dumeloga ka go mehlolo. Ka gona mafelelong e tla go fihla dilo tše di tatologela go dikologa go Modimo, go fihla

ge fao go swanetše go tla magahlano. Go ile gwa swanelo go ba nako. Ka gore, Abraham o be a le mojabohwa wa naga.

⁷⁵ O Modimo, gobaneng Bakriste ba sa kgone go bona? “Ba lehlogenolo ke basekegi ka pelong; ba tla bona Modimo. Ba lehlogenolo ke ba boleta; ba tla abelwa lefase.” Nako ya magahlano e batametše; Tate wa rena go bontšha gore re mo nakong ya bofelo. Le a bona? Mehlo, wa kagodimogatlhago, Mokgonatšohle o dira mehlolo. Mo lebeleleng.

⁷⁶ Bjalo ka nakong ya Abraham, feela pele ga nako ya bofelo, lebelelang se se diregilego ka lefaseng, tlase ka Sodoma, ka toropongkgolo ye kgolo.

⁷⁷ Abraham o phetše ka tenteng, yo a bego a le mojabohwa wa dilo tšohle, o phetše ka tenteng. Kafao ga go makatše moreti a ka re, “Tente goba khotetše, gobaneng ke swanetše go tshwenyega?” O mojabohwa wa dilo tšohle, ge o le ka go Kriste. Modimo o Mo file lefase, gomme Yena ke Kgoši. Gomme re ka go Yena, mojabohwa wa dilo tšohle, mokgonatsohle, mohlolo, le nakong ya magahlano.

⁷⁸ Hlokamelang ka sekgauswi bjale, ge re sepelela pele ka go se. Šetšang ka fao Modimo a dirilego feela pele ga nako ya bofelo.

⁷⁹ Loto, tlase ka Sodoma. Phapogo e be e oketšega. Monna o ba mahomoseke, go fapošwa, go fetola karolo ya tlhago ya motho ka go ditsela tša go fapoga.

⁸⁰ Lebelelang lefase lehono. Selo ka moka se ba lebaka le le fapošitšwego. Le mafelo a magolo, moo banna ba yago go ithuta bodumedi, ka dikolong tše kgolo. Gomme ke e boletše le go e tseba, moo banna ba sego ba dumelwelwa go nyala basadi, eupša go šiiša kudu. Le ka fao gore ka dikolong lehono, ka go dikereke tše tša sebjalebjale ntle kua, ka fao selo se segolo se! Banna ba nwele le go kgoga, le go emelana le maikutlo, le go kitima go theoša basetsana ba baswa le go ya pele, gomme ba thomile ka boseeng bja bona, go fihla tsela ya bona ya kgonthe ya bophelo e fapošitšwe. Modimo o ba file go ditshenylo. Gomme maphele a bona a hlakane go fihla ba se sa le banna ba tlhago le basadi gape. Diabolo o ba swere kudu.

⁸¹ Lebelelang magahlano kua le Sodoma le Gomora. Lebelelang magahlano ka matšatšing a Noage, ba nyala le go neelana ka lenyalong. Le bona kota ya leswao? Go diregile eng? Ka nako ya go swana, Modimo o bile le moprofeta mo lefaseng.

⁸² Pele ga nako ya bofelo... Še yona. Theetšang! Ka mehla, pele ga nako ya bofelo, ge Sathane a tlemolla baekiši ba gagwe, Modimo o roma baprofeta ba Gagwe. Gomme re a botšwa ka Beibeleng, gore, “Mo letšatšing la mafelelo masogana a lena a tla bona dipono, le godimo ga balata ba Ka le bahlankagadi.”

Baprofeta ba tla tšwelela gape lefaseng. Baboni ba pono ba tla tšwelela lefaseng, ka nako ya bofelo. Re mo. Re magahlanong.

Go profetilwe ke baprofeta bohole ba bakgethwa, tlase go kgabola lebaka, le go bolelelwapele ke Lentšu la Modimo le lekgethwa. Nako ya bofelo: ka fao Morena a tla dirago, ka fao ditšhegofatšo tša Gagwe di tla bago, le se diabolo a tla se dirago matšatšing ao, se se tla diregago, nako ya bofelo.

⁸³ Bokgethwa bja Modimo bo ka se kgone go emela bobe bja lefase. Eupša pele A se tliša magahlanong, O romela ntle mabone a mahubedu a tshebotšo. E sego seo feela, eupša pele Modimo a senya Sodoma le Gomora, gape O rometše Barongwa go lefase, bao ba hlakahlakanego bonabeng magareng ga batho.

⁸⁴ Gomme pele ga nako ya bofelo, Modimo o tshepišitše O tla romela Barongwa. Gomme re a ba bona. Ba tla ka Melaetša ya ramaatlakamoka Modimo. Nako ya magahlano! Go sa fete dibeke tše tharo tša go feta, go bona Yena yola yo maatla a eme fale, Yo a emego ge e sa le ke le mošemané yo monnyane, gomme ke boletše. Ga ke lehlanya; le tseba seo. Eupša ke go phethagatša Mangwalo.

⁸⁵ Ke nagana gore kereke ye e swanetše go tseba Therešo, le leswao fao re lego gona; gore le ka se ke la tšwafa; gore le tla ba godimo le go dira; gore diphapano di tla rarollwa, gommele tla sepela boka banna le basadi ba kgonthe ba bomodimo, pelo ya gago e beilwe go Kriste. Gomme le se ke la lebelela ka go dilo tše tša maaka tša lefase, ka gore ke tša diabolo; diphapano tšohle tše le dintwa, le dipako le go fapania. Lebelelang kgole go tloga go tšona. Re bofelong. Gomme, elelwang, le ka no se be le beke ye nngwe go e dira ka gare. Ga ke tsebe. Modimo a nnoši o a tseba. Re mo bofelelong.

Go be go le Noage, ka nakong ya gagwe.

Israele še, mo nakong ya bona.

⁸⁶ Abraham šo, magahlanong a a latelago, gare ga (le—le lefase) tlhago le sa kagodimogatlhago. Barongwa ba theogile. Ba bonagetše boka batho. Letago! Gomme ba ema hleng le Abraham, moprofeta, gomme ba mmotša, "Abraham, Modimo o tla dira sa kagodimogatlhago. E ka ba ka nako ye, ngwaga wo o latelago, go ya ka bophelo, Ke tla le etela. Mosadimogatša wa gago, bogolo bja mengwaga ye lekgolo, gomme o tla belega ngwana. Ke tla go bontšha maatla a Ka, phodišo Kgethwa. Ke tla go fetola, le go go bušetša morago go lesogana gape. Gomme ke tla fetola Sarah, le go mo dira motho wa go fapania." O tla mo dira mosadi yo moswa. "Ke nna wa mehlolo. Ke nna mokgonatšohle. Ke dira mohlolo. Amene. Ke tla le laetša maatla a Ka. Abraham, re nakong ya magahlano. Meoya ye mebe e fase ka kua ka Sodoma. Ee. E šoma magareng ga lefase tlase kua."

⁸⁷ E šoma fa lehono. Ka makgethe, le matsaka, le go hlaba metlae ya go tšwa tseleng, le dilo tšohle tše tša ditšhila go seyalemoya, thelebišene, ebile ga se e hlokolwa goba selo gape. Gomme go fapoša, dinako tše dingwe, Ebangedi, go taba ya

leago. Lefase ka moka le fetogile go fapošwa. Eupša nako ya go swana lefase le fapogilego, badumedi ba fetoletšwe, go Morena le Maatla a Modimo, ka go šoma le go bonagala ga Bokgonatšohle. Ka fao Modimo, ka kgaogelo ya Gagwe, o laetša pele dilo tše!

⁸⁸ O rile, “Abraham,” ge moprofeta yo a dutše ka tlase ga tente ya gagwe, mokgalabje, godimo ka go naga ya boopa. O tshwenyegile ka eng? Tente, goba khotetše, eng, se be se sa dire phapano ye itšego go yena. O be a le mojabohwa wa yona yohle. Se sengwe le se sengwe e be e le sa gagwe, gomme o se tsebile.

⁸⁹ Kafao modumedi o a tseba lehono. Re tshwenyegelang ka dilo tše tša lefase? Ke ka baka leo ke tlogelago dikopano, e se kgale kudu, ka baka la gore nka se ke ka soba batho ka meneelo. Ga ke kgathale se batho ba se bolelago, ke a dumela gore Modimo ke yo mogolo go lekanelo go fa se sengwe le se sengwe A se hlokago. Ee, mohlomphegi. Bokaone ke je magogo le go nwa meetse a lekala, le go rera Ebangedi, go phala go ba le dilo tše kaone tša lefase. Ga go kgathale, ge re di hwetša go ikgafela ka borena ka diatleng tša Gagwe, le go lebelela Bokgonatšohle. Yeo ke therešo.

⁹⁰ Šetšang moo e lego. Gomme re Mmona ge A latela, bjalo ka ge Abraham a dutše ka tlase ga tente ya gagwe, gomme Barongwa ba ba bonagetše go yena.

⁹¹ Ba ile tlase ka Sodoma le Gomora. Gomme re hwetša gore Modimo, mo letšatšing leo, o dirile mehlolo. O tlišitše mollo go tšwa lefaufaung le go swiela go tloša toropokgolo, le go hlwekiša naga, le go e fa yohle go Abraham. Gomme mosadimogatša wa Loto o fetogile pilara ya letswai, gobane o lebeletše morago, bjalo ka segopotšo sa kgobogo; yo a bego a le mohumagadi yo mogolo magareng ga disosaete tša toropokgolo, tša Gomora le Sodoma. Gomme meedi yohle e swietšwe ntie, ge Modimo a dirile mohlolo ka mollo le tshebelo go tšwa legodimong.

⁹² A nako ye botse! A nako ye kgolo go phela! Modimo, ka go bokgonatšohle bja Gagwe! Fao go tlide magahlano gape. (Ke nagana gore ke gateletšwe ka nako, ke tla swanelwa ke go hlaganelo.) Fao go tla Bokgonatšohle, Bogona gape.

⁹³ Go be go le moisa a bitšwa Ahaba, o nyetše mosetsana a bitšwago Isebele. Yo, e bego e le modumedi mathomong, Ahaba, o tswetšwe e le Mojuda, a bolotšwa letšatšing la seswai, go ya ka molao. Gomme o godišitšwe ka lapeng la bodumedi, go dumela go Jehofa, eupša o ratane le selo tsoko se sennyane sa mahlomabolou sa morapela diswantšho. Yeo ke nnete.

⁹⁴ Gomme, lehono, banna ba bakaone ba Bakriste ba wetše ka tlase ga tsela ya ditšiebadimo tše bjalo le matsaka, gobane pelo yela ga se e be go kgwahla ka go Kriste Jesu. Ee. A letšatši le re phelago ka go lona, a nako, dikota tša maswao di lebeletše mo ka sefahlegong.

⁹⁵ Eupša, ka gona, feela pele ga fao Modimo o tlišitše makgaolakgang, go laetša gore Modimo e be e le mang, go tlile nako mo go bego go le moprofeta a tlide ka nageng, ka leina la Eliya, yo a tloditšwego ka molaetša wa Modimo. Gomme o dirile mehlolo le go netefatša gore Bokgonatšhole bo sa le mohlolo. Moprofeta o eme ntle kua gomme a tswalela magodimo, gore e se ne ka matšatšing a bodiredi bja gagwe. Gomme o tlišitše dipula go theoga go tšwa magodimong le go fa lefase. Gomme Barongwa ba bonagetše go lefelotiragalo, haleluya, ba mo paketše borotho tsoko bja lehea bjoo bo mmolokilego matšatši a masomenne, a phela, ge a be a le ntle kua ka lešokeng le Modimo.

⁹⁶ Barongwa ba tšwelela mo nakong ya bofelo. Baprofeta bohle le dikotanatšhupetšo tša leswao go, mo letšatšing le, gore barongwa ba tla bonagala, baprofeta ba tla tsoga, maswao le matete. Gomme ge Modimo a dirile seo bakeng sa magahlano a mannyane ale morago kua, O tla dira eng bjale ge hele yohle e tlemologile? Legodimo lohle le tla lokolla, barongwa ba a tšwelela, maswao le matete lefaseng. Dikekišobofora di a tsoga. Modimo o netefatša se se lokilego le se se fošagetšego. Amene.

⁹⁷ Oo, ke a Mo rata! Ke na le nneta le a dira, le lena. Ga ke re go goeletša, eupša o tuka ka soulong ya ka, o nagana, ka fao gore mo letšatšing le.

⁹⁸ Feel a pele A ba lokolla, O dirile mehuta yohle ya maswao le matete. Ba rometše sehlopha sa batho godimo kua, go tšea moprofeta yo ka kgapeletšo. O rile, “Ge ke le monna wa Modimo, a nke mollo o tšwe legodimong.”

⁹⁹ Šetšang ka fao mollo o tlago nako ye nngwe le ye nngwe. Šetšang ka fao baprofeta ba tlago nako ye nngwe le ye nngwe. Šetšang ka fao mohlolo o dirwago nako ye nngwe le ye nngwe. Šetšang ka fao Modimo a hlatsətšago Yenamong ka go phodišo le maatla nako le nako, feela mo makopanong a ditsela, ga se nke peleng; thwi go ditsela tša magahlano, mo magahlanong, a fetoga ka go lebaka, a fetoga ka nako.

¹⁰⁰ Bjale, bakeng sa dihlogo tša go tswalela di se kae, šetšang motsotsso. Re tla ya bjale go ma—ma magahlano a magolo, le lengwe la magahlano, gobane la bohlano ke a *mahlano*, J-e-s-u. Amene. Go tla nako ge potšišo ya sebe e swanetše go rarollwa. Go tla nako moo mohlolo o swanetšego go itira Yenamong go kwešišwa ka botlalo. Go tla nako ge dipelo tša banna di ile tša swanelwa ke go fetolwa, ka baka la gore melao le baahlodi, le go ya pele, di ka se kgone go e dira. Madi a dipoo le dipudi ga se a kgone go a tloša.

¹⁰¹ Gomme feela pele magahlano a magolo a etla, fao gwa tla diabolo ntle magareng ga bareri, o rile, “Matšatši a mehlolo a fetile. Ga go selo se sebjalo.”

¹⁰² Gomme, nako yeo ya go swana, Modimo o rometše Barongwa lefaseng. Go be go le mokgalabje tlase kua yo a bego a ne

ntlo ka lenaneo, ka leina la Sakaria. O be a rapela. Letšatši le lengwe ge a be a sa le aletareng, a šišnya diorelo tša gagwe, a direla batho dipoelano, go tšweletše godimo ka lehlakoreng la gagwe le letona, Morongwa yo mogolo, a netefatša gore nako ya magahlano e be e batametše. O mmoditše gore o tla belega mošemane, go tšwa go mosadimogatša wa gagwe, yo a bego a tšofetše le go gwahlaufala. Gomme leina la gagwe e tla ba Johane.

¹⁰³ Johane o tliele pele, a tteleima mohlolo. Johane o be a le mopropfeta. Beibele e rile, Jesu o rile, ka Boyena, "Ga se gwa ke gwa tsoge gwa ba motho wa go tswalwa lefaseng go swana le yena," go fihla nako yeo. Haleluya! Gobaneng? O be a le mopropfeta, yo mogologolo a bilego go fihla nako yeo. Gobane, a e be e le magahlano a magologolo ao Modimo a kilego a a dira le diabolo, ge ditsela tša bona di putlagane, gomme fale O be a tla mo hlobola le go mo hlakola se sengwe le se sengwe a bego a na le sona. Haleluya! Johane e be e le mopropfeta.

¹⁰⁴ Gabariele o be a le Morongwa kua, a tšwelela ka nako ya magahlano. Letago go Modimo! E ka ba mengwaga ye masometharo tharo pele e direga, Modimo o thomile ka nako ye ntši, go ba sebotšapele gore nako ya magahlano e be e batametše. Basedumele ba be ba kgamathetše gampempe, le go e nyenefatša, le go e baka, le go leka go tloga le yona. Gomme, mafelelong, ba bolaile yo mongwe le yo mongwe ba bego ba mo romile, le dilo. Eupša Modimo o sepeletše pele ka mohlolo, go no swana, ka gore Ke mokgonatšohle. O swanetše go. Ke Modimo.

¹⁰⁵ Lebelelang se se diregilego bjale, ge re sepelela godimo ka go tiragalo ye—ye fa. Ge re etla godimo, re bona Johane a etla nokeng, a rera. O bolela ka Yena yo a bego a etla, o maatlamaatla go mo feta; a thoma go rera. Ka morago ga lebakana, gwa bonagala go se yo motee ntle le Mokgonatšohle ka Boyena, a phuthetše godimo ka go ngatana ye nnyane ya nama. Jehofa Modimo yo mogolo o ikutolotše Yenamong ka go Morwa wa Gagwe, Kriste Jesu. Bokgonatšohle bo dirilwe nama gomme bja dula magareng ga rena, bja sepela magareng ga rena. Haleluya!

¹⁰⁶ Ge A be a sepela godimo ga Lewatle la Galelia, bošego bjo bongwe, a robetše mošola, sekepe se sennyane sa kgale se tšokatšokišwa, O dirile mo o ka rego O be a bile a sa fe šedi ye e itšego. O be a lapile. Eupša go tliele nako ya magahlano; se sengwe se ile sa swanelwa go direga. A bea leoto la Gagwe godimo ga bomorago bja seketswana, gomme a lebelela godimo gomme a re, "Khutšo. Homola." Ke a le botša, yena Mohlodi wa magodimo le lefase o robetše ka sekepeng sela, gomme tlhago e ile ya swanelwa ke go O obamela. Ge Mokgonatšohle a bolela, mehlolo e a direga. Amene.

¹⁰⁷ Molephera wa go tlala lephera, o ile go Yena letšatši le lengwe, o rile, "Morena, Wena o ka kgona ge O rata, o ka kgona go ntira ke hlweke."

¹⁰⁸ O mo kgwathile, o rile, “Ke a rata. Wena hlweka.” Gomme ge Bokgonatšohle a bolela, mehlolo e a direga. Haleluya! Lephera la gagwe le nyamaletše, boka letšatši le fofa go tloga ka morago ga leru. Kgonthe. Mokgonatšohle o a bolela.

¹⁰⁹ O tshepišitše, ka go matšatši a a mafelelo, gore O tla bolela gape. Ge Mokgonatšohle a bolela, mehlolo e a direga. Ee, mohlomphegi.

¹¹⁰ Elang hloko. O fodišitše balwetši. O tsošitše bahu. O butše mahlo a difofu. E be e le eng? Go netefaletša batho gore magahlano a be a le fao. “Ke na le Maatla a go bea bophelo bja Ka fase. Ke na le Maatla a go bo tseela godimo gape. Ga go motho yo a bo tšeago go tloga go Nna.”

¹¹¹ Letšatši le lengwe, ka go Johane 17, O lebeletše godimo gomme o rile, “Tate, iri e tlide.” Haleluya! “Magahlano a mo. Dilo tšohle di fedile bjale. Dilo tšohle di a itokiša. Makopano a ditsela a tlide. Lefase le seboditšwe. Ke tloditše baapostola ba, gomme ba dirile maswao le matete. Re fetile go kgabola naga. Re kamile morago le pele. Nako e mo. Nakoe tlide.”

¹¹² Ngwanešu, bjalo ka moreri wa Ebangedi mosong wo, ke a dumela gore Moya wo Mokgethwa, o bolela ka dipounama tša go hwa lehono, tša badiredi ba ba tloditšwego, ba a bolela, “Nako e tlide.” Nako e mo, gomme Bokgonatšohle bo a araba. Mohlolo o a direga; o swanetše; re magahlanong.

¹¹³ Gomme, fao, ge A dirile mehlolo yohle, ge Bokgonatšohle, Modimo a bonagetše nameng.

¹¹⁴ “Bolela lentšu, Morena, gomme mohlanka wa ka o tla fola. Mohlanka wa ka o tla ba...O tla phela.” O tsebile. Molaolalekgolo wa Roma o tsebile. O be a le monna ka tlase ga maatlataolo, gore o tsebile gore e ka ba eng e bego e le ka tlase ga gagwe e bile...E ka ba eng a e boletšego, ba ile ba swanela go e dira. O rile, “Ke re go monna yo, ‘Etla,’ gomme o a tla. Gomme monna yola, ‘Sepela,’ o a ya.” O rile, “Ke nna motho ka tlase ga maatlataolo. Gomme se sengwe le se sengwe ka tlase ga maatlataolo a ka se a nkobamela. Gomme, Morena, ga ke na maswanedi gore O tle ka ntlong ya ka. E no bolela lentšu.” Haleluya! O tsebile, yoo e be e le Bokgonatšohle. O tsebile ge Bokgonatšohle bo boletše, mohlolo o tla direga. Oo, nna!

¹¹⁵ Šole O eme mo lebitleng la Latsaro, a lla, boka motho mo nameng ya gagwe. Mareta o rile, “Morena, ge feela O ka be o be o le mo, ngwanešu wa ka a se a hwa. Eupša le bjale, Mokgonatšohle, bolela! E ka ba eng O e kgopelago Modimo, Modimo o tla e dira. E ka ba eng O e bolelago, O tla e dira.” Fale, O sepeletše lebitleng.

¹¹⁶ Bokgonatšohle, bo bonagatšwa mo magareng ga rena, bo phela le rena. “Modimo, ka go Kriste, o boelantše lefase le Yenamong.” Šo O phetše le rena, Modimo a inetefatša Yenamong ka

Morwa wa Gagwe, Kriste Jesu. O be a le mokgonatšohle le wa mehlolo.

¹¹⁷ Gomme ge A swana maabane, lehono, le go ya go ile; gomme O rile, “Nka se tsoge ka le tlogela. Nka se tsoge ka le šia. Ke tla ba le lena go ya bofelong bja lefase.” Re ka kgora bjang go lebelela eng kapa eng gape eupša, ge A bolela, bakeng sa mohlolo go direga? Re ka letela bjang e ka ba eng gape?

¹¹⁸ Ka fao šo O a ya, go theogela lebitleng, a lla. Gomme ka gona Bokgonatšohle bo ikgoboketša ka Bobjona mmogo, gomme O boletše. “Latsaro, etla pele!” Gomme monna yo a bego a šetše a bodile; nko ya gagwe e be e wele go tšwa sefahlegong sa gagwe, ka matšatši a mane. Diboko tša letlalo di be di šetše di tsene ka gare. Tshenyego e tsebile Mong wa yona. Haleluya! O neetše morago bophelo bja monna yo a hwilego. Gomme monna yo gatee a bego a hwile, o eme ka maoto a gagwe gomme o phetše gape. Mohlolo!

¹¹⁹ “Ke nna tsogo le Bophelo,” go boletše Modimo. “Yo a dumelago ka go Nna, le ge a hwile, go le bjalo o tla phela. gomme mang kapa mang a phelago gomme a dumela ka go Nna a ka se tsoge a hwa.”

¹²⁰ Bolela, Bokgonatšohle! Mehlolo e tla direga. Gomme ka mehla O e dira magahlanong. Gomme re magahlanong. Sebotšegang ge le bona dilo tše di direga. Re mo nakong ya bofelo.

¹²¹ Mokgonatšohle o a bolela, gomme monna wa go hwa, a hwile, o phetše gape; a ema ka maoto a gagwe, gomme a ya moletlwaneleng gomme a ja selalelo le Yena. Oo, nna! Go diregile eng?

¹²² Letšatši le lengwe la letago! Bohle bao gatee re bego re hwetše sebeng le dikarogong, Bokgonatšohle bo boletše. Re be re eya heleng, gomme Bokgonatšohle bo boletše. Re tsogile go tšwa heleng, go ya Letagong, gomme letšatši le lengwe re tla ja Selalelo sa moletlwana ka letšatšing la mafefelo. Bokgonatšohle bo a bolela. Lentšu la Modimo ke mokgonatšohle. Re a Le dumela, gomme re tsogile go tšwa lehung go ya Bophelong.

¹²³ “Yo a kwago Mantšu a Ka gomme a dumela go Nna, le ge a be a hwile, go le bjalo o tla phela. Mang le mang a phelago gomme a dumela go Nna a ka se tsoge a hwa.” Bokgonatšohle!

¹²⁴ Re bjalo ka Noage, re aga areka. Mohlolo o tla direga letšatši le lengwe ge Tlhatlogo e etla gomme Jesu a etla. Re magahlanong bjale. Ge le bona dilo tše di direga, phagamišang hlogo ya lena, topollo ya lena e batamela kgauswi. Mokgonatšohle o a bolela gomme mehlolo e a dirwa.

¹²⁵ O rile, “Re magahlanong, Tate. Ke swanetše go netefatša O Mang.” Gomme O tsošitše bahu. O fodišitše balwetši.

¹²⁶ Ge iri mafelelong e etla go Yena gore a sepele, O sepetše ka go kokobela go ya sefapanong gomme a kokotelwa fao, a beetšwe sekgalana. O be a se wa Legodimo; O gannwe ke Legodimo. O gannwe lefaseng. Ka morago ga ge batho ba bone maswao le matete a A di dirilego, ba Mo kwerile le go Mo kwera; le lefase la sebe la go hloka modimo la sebe. Eupša ge kahlolo e mo phagamišitše, ya phagamiša areka, kahlolo ya meetse; go bile bjalo ka Jesu, ka kahlolo ya Modimo e tšholletšwe ntle godimo ga Gagwe. O hwile sebakeng sa rena, gomme a phagamišetšwa godimo.

¹²⁷ Gomme modumedi o khutša ka go Yena, boka Noage ka arekeng. A nke kahlolo e swiele, ke phapano efe e dirago? Nnete. Eng? Eng? Le lehu ka bolona ga le na le dišitiši, ga le na le dihlabi. “O lehu, lebola la gago le kae? Lebitla, phenyo ya gago e kae?” Ga se gwa ke gwa ntšoša go feta serapeng sa mabitla. Nka goeleta ditumišo tša Modimo, ka gore ke a tseba, le go phela ka go Yena go ya go ile. Nnete.

¹²⁸ Bokgonatšohle o boletše. E boletše le pelo ya ka. E boletše le pelo ya gago, mohlolo o dirilwe. Gatee modiradibe yo monnyane wa lefšega, mohlomongwe... go swana le ge o dirile, letagwa, goba mokgogi wa sekerete, goba mokitimi go ya ditansing le go ya pele ka mokgwa woo. Mokgonatšohle o boletše, gomme o e amogetše, gomme mohlolo o dirilwe; gomme o fetogile go tloga lehung go ya Bophelong, gomme o tlogetše dibe tša gago!...?... Bokgonatšohle bo boletše, gomme mehlolo e dirilwe. Nnete.

¹²⁹ Go na le batho ba dutše ka kerekeng ye, mosong wo, mengwaga e se mekae ya go feta ba be ba tlemilwe ka kankere, ba ehwa. Go na le bale ba dutšego fa, bao ba bego ba golofetše le digole, le ba go omelela le ba go šwašwaela. Gomme Bokgonatšohle bo boletše, gomme mehlolo e dirilwe. Nnete. Kgonthe. Leswao ke eng? Re magahlanong. Re mo magahlanong a ditsela bjale. Re lokišetša go tsena Mileniamo.

¹³⁰ Bjale šetšang, re sepeletše godimo. Gomme ge ba dirile, ge ba Mo tsapotše gare ga magodimo le lefase, Legodimo ga se la ke la kgona go Mo amogela, sebe sa lefase se be se robetše godimo ga Gagwe. Gomme lefase le Mo ganne, bjalo ka Kgoši ya bona. Go be go se felo le le tlogetšwego go Yena go hwa. O be a ka se kgone go tla Legodimong, ka gore O be a na le dibe tša lefase godimo ga Gagwe. O be a hloilwe le go nyatšwa, le go tshwelwa godimo, le go ganwa le go ganwa ke lefase. Eupša O eme gare ga magodimo le lefase, gomme a dira leporogo la tsela. Gomme monna yo mongwe le yo mongwe goba mosadi yo a kganyogago go, a nke a tle ka moela woo wa Madi go tšwa lehlakoreng la Gagwe, go ya Letagong. Bokgonatšohle!

¹³¹ Go diregile eng? Maswao le matete a diregile. Go diregile eng? Ngwedi o thoma go lla. Letšatši le tswaletše mahlo a lona gomme la thoma go lla. Gomme le ile ka go tlalelo ye bjalo,

go fihla le bile le kidibalo, le go fetoga boka madi a go rotha. Nnete, le dirile. Ge ba bone Mohlodi wa magodimo le lefase, a gannwe ke lefase. Gomme, sebe se sentši bjalo, O be a sa kgone go tsena ka Legodimong; le go hwa bjalo ka mmoelanyi magareng ga Modimo le motho, go ema magareng ga magodimo le lefase.

¹³² Letšatši ga se le kgone go e kgotlelela, le rile, “Nka se sa phadima gape,” kafao le ile morago. Dinaledi di rile, “Nka se kgone go lebelela se.” Ya. Lefase le rile, “Nka se kgone go le kgotlelela,” gomme le bile le go hwa dihwahwa ga megalatšhika, le go kgebela pele maswika go tšwa lefaseng. Mohlolo o diregile! E be e le nako ya go fetoga, e be e le bofelo bja tsela, sebe se be se bušitše, go fihla sefapanong, eupša sebe se be se lefetšwe kua. Oo, nna! Gomme lefase le šikinyegile thata kudu go fihla le lahletše maswika ntle ga mobu wa lona, goba le lekeletše ka dithabeng. Ebile le go šikinyega thata kudu go fihla bahu ba tsogile go tšwa lebitleng. Bolela ka go hwa dihwahwa ga megalatšhika! Gomme letšatši le thoma go ba le dikibalo, gomme le ile ntle. Mohlolo o diregile! Haleluya! Ka mehla o dira magahlanong.

¹³³ Lebelelang se se diregilego go seo, gomme seo se be se no lokišetša se. Ba ile ntle ka go mabaka a leswiswi, mengwaga ye makgolo a lesometlhano. (Ke duma ge nkabe re bile le nako, eupša re pitlagane. Ke nyaka go tšwela ntle ka ya lesomepedi.) Gomme hlokomelang, gore, go tla go kgabola fale le mabaka a leswiswi. Ke duma ge nkabe re na le nako go ya ka go nako, se se diregilego ka go nako ya Wesley le Luther, nako yela ya boselela, gore go bile le phetogo e etla, ge kereke e lokolotšwe go tloga go leswiswi gomme ya tlišwa ka go seetša se sebotse sa Ebangedi gape. Maswao le matete! O Modimo, ka fao go segó motho a emego, le phodišo Kgethwa le maswao le matete di diregilego. Gomme e be e le gare ga sehlabelo le go Tla la Bobedi, gomme lebelelang se se diregilego nako yeo. Ge John Wesley a be a rera Ebangedi, o ile a ragelwa ka ntle ga dikereke le dilo, go fihla batho ba wela lebatong, gomme ba tšhetše meetse sefahlegong sa bona. Ga se ba tsebe se e bego e le bothata ka bona, go idibala ka tlase ga Maatla a Moya wo Mokgethwa. Maswao, le matete, le mehlolo, le diphodišo, di diregile.

¹³⁴ Bjale, ngwanešu, kgaetšedi, theetša. Go direga eng bjale? Re mo nakong ya bofelo. Re ya ka Mileniamong; seatla se sengwe le se sengwe se šupa ka tsela yeo. Sešupanako sa kgale se a rethetha, e ka ba metsotso ye mebedi go fihla bošegogare. Bokgonatšohle bo a bolela. Barongwa ba a tšwelela. Baprofeta ba a tla. Baprofeta ba a profeta. Dipono di tšhollelwa ntle godimo ga bona batho ba letšatši le. Ebangedi e a rerwa. Balwetši ba a tsošwa. Difofu di a bona. Difoia di a kwa. Bodiabolo ba a befelwa. Baekiši, Jannes le Jamboro, ba mo. Eupša, Bokgonatšohle bo a bolela. Haleluya! Re ka letšatšing la mafelelo. Re ka magahlanong.

¹³⁵ “Dipelo tša batho di palelwa ka letšhogo; nako ye thata; tlalelo gare ga ditšhaba.” Lefase le tšhoga kudu go fihla le phatlola pele ditšhišnyego tša lefase mogohle. Jesu o rile go tla ba ka tsela yeo. Go tla ba ditšhišnyego tša lefase mafelong a go fapania. Bothata ke eng? Lefase le a tseba o senyegile. O tšhogile. Lefase le tšhogile.

¹³⁶ Eupša Kereke e otlela ka go Ebangedi. Yeo ke tsela ka tšhireletšo. “Yo a tlago go Nna, Nka se mo rakele ntle.” Haleluya! “Ntle le ge motho a tswalwa ka meetse le Moya, a ka se tsene ka Mmušong.” Ka Mmušong, o na le setswalelo sa Modimo sa kamogelo, Moya wo Mokgethwa ka pelong ya gago. A nke maphotho a otle kae kapa kae a nyakago. Dinako di befa kudu. Bokgonatšohle bo a tsoga. Baekiši ba leka go dira boka bjona. Le mehuta yohle ya dilo, ba leka go dira se.

¹³⁷ Gomme Beibele e rile, moekiši yo mogolo yola wa mafelelo o tla tsogela godimo ka kua gomme a dula godimo ga dithaba tše šupago. O tla rwala korone ya go hlatlagana gararo. Gomme o be a tla fa maatla, le go ba le maatla, bontši kudu go dira mollo go tla fase go tšwa legodimong, ka bogoneng bja batho. O tla dira tšohle tša tše, tšohle tša tše mo letšatšing la mafelelo.

¹³⁸ Le ka fao gore ba tla ema le go ekiša batho, go inangwa go dibatlabadimo tša batho ba ba hwilego, le se sengwe le se sengwe, le go fogohletša marapo le se sengwe le se sengwe. Eupša, ge ba sa fogohla marapo le go inama go dibatlabadimo, Bokgonatšohle bo a bolela gomme mehlolo e a direga. Ba re, “Ke sehlopha sa ditšiebadimo.”

¹³⁹ Eupša Kereke e a gola, ditsošeletšo tše kgolo tša phodišo di gohle godimo ga naga. Maswao le matete a ya mogohle. Barongwa ba tšwelela go batho. Maswao le matete a fa. Ke eng, mogwera? Re mo nakong ya bofelo. Re mo magahlanong. “Phagamišetša hlogo ya gago godimo,” O rile, “topollo ya gago e batamela kgauswi.” Le bona se ke se rago? Ke nako ya magahlano.

¹⁴⁰ “Gomme go tla tla go phethega,” go boletše Modimo, “ka matšatšing a mafelelo, Ke tla tšollela ntle Moya wa Ka. Barwa le barwedi ba lena ba tla profeta,” baprofeta ba tshepišitšwe. “Masogana a lena a tla bona dipono. Gomme Ke tla bontšha matete magodimong godimo,” dipiring tša go fofa le se sengwe le se sengwe. “Tlalelo ye kgolo; lefase le tla šišinywa ka ya go fapania . . .” Ditšhišnyego tša lefase tše kgolo di tla be di etla, gomme dibolekheno tše kgolo di tla direga, le bothata bjo bogolo, tlalelo magareng ga lefase. Ditšhaba di tla be di leka go hwetša khutšo, ka thipa ka morago ga mokokotlo wa tšona. Go tla ba bothata mo gohle, dilo tše tšohle. Gomme batho ba tla gola gammepempe le go befa.

¹⁴¹ “Gomme ge lenaba le etla ka gare boka lefula, Ke tla phagamiša seemo kgahlanong le lona,” Moya wa Modimo. Nako

ya magahlano! Bofelo bja tsela. Afrika e rora ka kopano ye kgolo ya phodišo. Gomme maswao le matete di tšwelela, gohle go dikologa lefase, mogohle. Ke eng? Nako ya magahlano. Nako ya bofelo.

¹⁴² Dikarikana tša go se be le dipere di “nyeuma tseleng ye e bulegilego.” Dilo tšohle tše tša go fapana O di boletše. “Barwedi ba Tsione, ka fao ba aparago le go sepela.” Ka fao mahomoseke le dilo tša go fapana di tla tšwelelago; ka fao, phapogo, “banna ba tla fiwa godimo go phoro ye maatla,” le dilo tšohle tše bjalo ka tše. Ka fao ba tla bago “hlogothata, monagano wa godimo, barati ba boipshino go feta barati ba Modimo; barobadikwano, baphari ba maaka.”

¹⁴³ Gomme a mangwe a matšatši a, ngwanešu morategi wa ka, Jesu o tla tla. Gomme bao ba toutago, ka go se ba se bitšago “bohlanya” lehono, go dumela ka go Ebangedi ya fešene ya kgale ya Kriste, gomme Mokgonatšohle a bolela, mohlolo o direga!

¹⁴⁴ O rile, “Maswao a a tla latela bona ba ba dumelago. Leineng la Ka ba tla lelekela bodiabolo ntle, ba bolela ka maleme a maswa; goba go swara disephente, goba go nwa dilo tše di bolayago, di ka se ba gobatše; Ge ba bea diatla tša bona godimo ga balwetši, ba tla welwa ke maruru.” “Dilo tše tše Ke di dirilego, le tla dira bjalo. Ke tla ba le lena ka mehla, ebile go fihla bofelong.” “Ge dilo tše di thoma go bonagala, phagamišang hlogo ya lena, topollo ya lena e batamela kgauswi.”

¹⁴⁵ Le a bona, bagwera, feela bjalo ka ge go bile ka matšatšing a Noage, ka go tleng ga Morwa wa motho. Kafao go bjalo ka matšatšing a go lokolla Israele. Kafao go bjalo ka Morwa wa motho mo sefapanong. Kafao re mo magahlanong. Modimo ka mehla o bontšha mehlolo, o dira maswao a magolo le matete, o fodiša balwetši, o tsoša bahu, o lelekela bodiabolo ntle, moyo wo mogolo wa tsošeletšo; maswao legodimong, le lefaseng; tlalelo magareng ga ditšhaba. Re magahlanong.

¹⁴⁶ Selo sa go latela ke eng? Jesu Kriste o tla tla gape lekga la bobedi, ka letagong, go amogela bohole bao ba hwetšego ka go Kriste le go phela ka go Modimo. Modimo o tla tliša yo mongwe le yo mongwe le Yena. Gomme ba boleta ba tla abelwa lefase, gomme Mileniamo wo mogolo o tla tsena. Gomme go ka se se ba le dintwa. Ba tla kgobelka dibetša tša bona, le go kgoloka tša bona... ba bea marumo a bona ka go dihuku tša go thenela le megoma, le go ya pele. Gomme ditšhaba di ka se emiše tšoša godimo kgahlanong le setšhaba gape. Ebile go ka se be bolwetši bjo bo itšego gape, go ka se be bothata bjo bo itšego gape, go ka se be le bohloko bja pelo bjo bo itšego gape. Eupša Kua re tla phela, ka Bogoneng bja Gagwe mo, go ya go ile le go ya go ile.

¹⁴⁷ Gomme, maswao ohle a le dilo, re mo magahlanong. Re mo tseleng ya mafelelo.

¹⁴⁸ Ke thabile kudu lehono go tseba gore, ka go Kriste Jesu, ke kgwapareditše soulo ya ka ka go lefelo la go khutša. Ke thabile kudu go bona Modimo, ka go Lentšu la Gagwe le lekgethwa, a dira le go fa maswao le matete. Gomme go tseba gore, lehono, pele ga kereke ya ka ye nnyane mo, gore ke kgona go bolela se, bjalo ka ge ke dirile pele ge ke ile pele nako ye nngwe. Le tla bona a magolo, a go hlomphega Maatla a ramaatlakamoka Modimo ka go mokgonatšohle, Maatla a mehlolo ao a tla dira ka go fetiša ka botlalo, ka godimo ga tšohle tše re kilego ra di gopola goba ra di dumela. Gomme thwi mo mojako bjale. Gomme le a e bona e hlatselwa, thwi go mojako wa kereke wa lena beng mo.

¹⁴⁹ Kafao, bagwera barategi ba ka ba bannyane, le se tsoge la nyefiša go Kriste. Le phelela Yena, go kgabola sefapano. Phagamišetšang dipelo tša lena godimo, gomme le sware diatla tše kgethwa go Modimo. Gomme ge kereke, eng kapa eng, e thoma ka tsela *ye*, ka tsela *yela*, goba batho ba bolela goba ba bolela *se*, le se ke la ela šedi ye e itšego go yona. Bolokang dipelo tša lena botee sefapanong le Kriste, gomme le phelela Yena. Modimo a e fe go lena. Re ka magahlano, makopano a ditsela.

¹⁵⁰ A re ka inamiša dihlogo tša rena nakwana feela, bakeng sa lentšu la thapelo. Ke nyaka kgaetšedi go bapala pina ye botse ye ya kgale, *Tumelo Ya Ka E Lebelela Godimo Go Wena*, 189 . . . - 84, ge re sa le ka thapelong. Ke a makala . . . ka dihlogo tša lena di inamišitšwe.

¹⁵¹ Re magahlanong, mogwera. Re fao. Dilo tše tšohle, phapošo ye magareng ga basadi le banna, tlaleoo ye kgolo ye yeo le e bonago, ke eng? Ke e netefaditše ka Beibele. E bile, nako le nako, magahlano. Ga se nke *pele* ga magahlano; ka mehla *mo* magahlanong. Feel a pele. . . Le a bona, banna ba tlogile bjale. Ba arogetše go thutamodimo. “Gomme matšatši a mehlolo a fetile.” Le a bona? Le a bona ba e dirile ka go lebaka le lengwe le lengwe.

¹⁵² Eupša feela pele ga nako ya phetogo, Modimo o tlie fase ka go bokgonatšohle gomme a dira mehlolo. Ke ka baka leo batho ba boleLAGO ka nna le go bolela dilo tše ba di dirago. Ke ka baka leo ba boleLAGO ka Bakriste bohole ba ba dumelago seo.

¹⁵³ Eupša le bona se se diregilego go bona morago kua, ba ba dumetšego? Ba be ba bolokegile. Abraham o be a mno bolokega ka mo a kgonnego go ba. Amene. Go bile bjalo ka Moshe; go be go se dikotlo di mo tshwentšego goba Israele. Ebile go be go sa tshwenye Noage. Henoge o tšeetšwe godimo pele e ka tsoge ya direga, a emeleta godimo ga ntłhorwana ya Letago, a e bogetše e eya pele.

¹⁵⁴ Ge o le fa mosong wo, ntle le Kriste, tseba gore soulo ya gago ga se ya loka, ge le sa ne dihlogo tša lena di inamišitšwe. Ke duma le ka dira, go Modimo. Ga ke tsebe ke tla tsoge ke boletše le lena neng gape. Eupša re magahlanong. Ge o nyaka go

gopolwa ka thapelong, go Modimo, a o ka no phagamišetša seatla sa gago go Yena bjale? Modimo a go šegofatše, mohlomphegi. Modimo a go šegofatše, mohlomphegi. Wena, wena. Ee, Modimo a go šegofatše. Bontši bja lena, ditasene tša diatla.

¹⁵⁵ Bjale ge le sa inamišitše hlogo ya lena, re nyaka kereke ka boleta go hama se. Ge o kganyoga, re na le aletara ye e bulegilego mo, etla gomme o neele feelsa lentšu la thapelo le nna, go Modimo, bakeng sa soulo ya gago. Ke tla thaba go e dira, go rapela le wena.

Tumelo ya ka e lebelela godimo go Wena, (Ga go selo gape eupša Wena.)

Wena Kwana ya Khalibari,
Mophološi Mokgethwa;
Bjale nkwe ge ke rapela,
Tloša sebe sohle sa ka,
O ntumelele go tloga letšatši le
Go ba wa Gago ka moka!

A nke mogau wa Gago wa go huma...

¹⁵⁶ A le a rapela? A le Mo kgopela go ba le kgaogelo go lena? Sokologa, mogwera modiradibe. Gonabjale Mo fe bophelo bja gago.

Hlohleletša phišegelo ya ka;
Bjalo ka ge O nkhwetše,
O a nke lerato la ka go Wena,
Go seka, borutho, le go se fetoga le be,
Mollo wo o phelago!

Ge a sa letša temana ye nngwe, a re beng thapelong bjale.

¹⁵⁷ Tate wa Legodimong, gabotse, ga re bontši, le go thoma, Morena. Re no tla fa gobane O re boletše go beng gona. O re fepile le go re boloka. Rena ba re Go amogetšego, re leboga kudu, Morena, go tseba se; gore letšatši le lengwe gore re ya go fetolwa, mmele wo mobe wo wa kgale wa kgobošo wo re phelago ka go wona, o tla fetolwa le go breakanya le go dirwa go swana le mmele wa Gago. Re khutša re bolokegile ka arekeng ye.

¹⁵⁸ Gomme ka Lentšu la Gago, mosong wo, ka Moya wo Mokgethwa, O tlisitše batho lefelong la leswao. Re bofelong, phetogo. Maswao le matete a a tšwelela, dilo tše kgolo di a direga. Re a tseba, Morena, gore re mafelelong. Ke ka baka leo dilo tše di lego mo. Bontši nako efe kapa efe, re tla bona Morena a etla.

¹⁵⁹ Gomme, Modimo, ke a rapela, O tseba dipelo tša batho. Ke ba fa moneelo wo, taletšo ye. Ba ka tla, Morena, ba Mo amogela bjale. O rile, “Yo a tlago go Nna, Nka se mo rakele ntle. Yo a kwago Mantšu a Ka, gomme a dumela go Yena yoo a Nthomilego, o ne Bophelo bjo bosafelego, gomme a ka se tle kahlolong; šetše a fetile go ya Bophelong bjo bosafelego.”

¹⁶⁰ Ke a rapela, Tate, O tla šogana le dipelo tša batho lehono. E sego go ba fa go phegelelwa; ke a dumela letšatši la seo le fetile. Feela se se se go nene O se tlogetšego, Morena, se swanetše go tla ka go hlapogelwa, go felela, godimo ga boipolelo bja bona, go dumela, go amogeleng Kriste, le go tteleima gore Modimo o tlile pelong ya bona le go bolela. Ke a rapela, Modimo, ge O kokotile ka dipelong pele, gore ye e tla ba go kokota gape lehono. Ge e le mafelelo, e fe, Tate. Lentšu la Gago ke Therešo. Re E neela go Wena, bjale, Morena, gore Moya wo Mokgethwa bjale o tla šomana le pelo ye nngwe le ye nngwe, ge re opela temana ya mafelelo.

¹⁶¹ Ka dihlogo tša lena di inamile. Ge o kganyoga go tla aletareng go rapela, mogwera modiradibe, etla pele bjale, ge o amogela Kriste. Goba lena ba le kgelogilego, etlang thwi bjale gomme le eme aletareng. Re tla rapela thwi le lena. Go lokile.

. . . ke gata tsela ya bophelo ya leswiswi, (Seo
ke se o se dirago.)

Gomme manyami go ntikologa a alega, (Lehu,
bolwetši.)

Morena, wena eba Mohlahli wa ka; (O
Modimo!)

Laela leswiswi go fetoga letšatši,
Phumula megokgo ya bohloko,
Goba o se tsoge wa ntumelela go hlahlatha
Go tloga go Wena go ya thoko.

¹⁶² Ka dihlogo tša lena di inamišitšwe. Ngwanešu Wood, ke nyaka o phagamiše hlogo ya gago motsotsso. Ngwanešu Cox, lena ka moagong, le Ngwanešu Fleeman? Ke nyaka le phagamiše hlogo ya lena, feela lena banna. Le bona se ke le boditšego? "Ruri, ruri! Ke re go lena, gore, moprofeta ka nageng ya gabon mong, magareng ga ba gabon mong."

¹⁶³ Bjale, wa rena wa go loka, Tate wa Magodimong, re neela Molaetša wo go Wena, Morena, dipeu tsela di bjetšwego botebong ka go dipelo tša batho; gore letšatši le lengwe la letago, Jesu o tla tla, gomme o tla hwetša bakgethwa bohle. Yo, A ratago, gomme yo mongwe le yo mongwe o tla hlatlošwa le go tšeelwa Letagong. Gomme a letšatši la tlhalalo le tla bago, ge Jesu Morena wa rena a bowa! Re a lemoga gore re leboga kudu go pheleng mo letšatsing le.

¹⁶⁴ Gomme, Modimo, ke sokologa go se sengwe le se sengwe, le go tseba gore re ka se kgone go phela ka go renabeng, Morena, eupša re—re badiradibe, sa mathomo. Gomme letšatši ka letšatši, ke tshepela go Wena, ke tseba gore letšatši ka letšatši ke dira sebe, ke tseba gore dilo tša letšatši ka letšatši di direga go nna le ka bophelong bja ka, tšeou O ka se thabego ka tšona. Gomme ke ipolela phošo ya ka le go Go amogela, Morena wa Ka, bjalo

ka ge soulo ya ka mong e robetše aletareng, mosong wo, ka go tabarenenekele ye nnyane ye, go patlama fa, Morena.

¹⁶⁵ O Modimo, ke Go šaeditše morago mošola, ka dimpho tšela tše Kgethwa, bjalo ka ge O bontšitše ka mohlolo kudu mošola, bosegong bjo bongwe. Gomme ke maswabi. Ke sokologile go Wena, ka ponong. Gomme bjale ka go la ka le letona... Ka go sekgao se seo ke phelago ka go sona bjale, ke sokologa go Wena, Morena wa ka, gomme ke kgopela Wena gore O tla ntshwarela, gomme o tla nthuša. Gomme ka mogau wa Gago, gore O šetše o mpoditše gore dilo tše di be di eya go direga ka moso bjale. Go tsebeng gore ba tla, kagona, Morena, ke kgopela gore O hlwekiše soulo ya ka le pelo ya ka, bjalo ka ge ke Go fa yona.

¹⁶⁶ O Modimo, se šišinye lefase feela, eupša magodimo gape. Morena, a re yeng ka mašemong mošola, moo dimilione di letilego, Morena, le go swarwa ke tlala le go nyorwa, le go lla le go kgopela, gomme bahetene ba a hwa ka leswiswing.

¹⁶⁷ O Modimo, šikinya se segolo se, setšhaba sa go bootswa sa Amerika, se se wetšego bošilong, gomme Sodoma le Gomora ya sebjalebjale. “O wena morwa wa moso, o wele bjang?” “O kitimile gabotse; go diregile eng go wena?” Eupša, O Jerusalema, Jerusalema, ke ga kae A ratilego go go alamela! Gomme go bjalo ka Amerika lehono, bjalo ka ge Moya wo Mokgethwa o lla ka pelong ya ka, “Ke bontši gakaakang nkabego ke go dirile serumola sa go lauma go setšhaba le go lefase! Eupša, o amogetše Hollywood, o amogetše difešene tša lefase. Gomme bjale o filwe go Jannes le Jamboro. Le ka fao la lena—ka fao letšatši la lena le tlidego! Ka fao banna ba maatla ba swietšego setšhaba, ka fao ba kamilego go kgabola bakeng sa se ba ka kgonago go se hwetša, gomme bjale O gogela kgole le go tlogela ditšhaba tše dingwe.” O Modimo, o beilwe mo meloreng ya marope a gagwe mong. O beilwe godimo ga molomo wa gagwe mong wa matsaka. Gomme letšatši le lengwe la letago, Morwa wa Modimo, ka go toko ya Gagwe ye kgethwa, o tla utollwa go tšwa Legodimong, gona re tla ema kae?

¹⁶⁸ O Modimo, efa lehono gore dipelo tša rena di hlongwe ka go Wena. Re lebalele dibe tša rena tše dintši. Gomme, Tate, šegofatša badiredi ba ba lego fa mosong wo, bareri ba Ebangedi. O Modimo, a nke ba ye ntle lehono ka Molaetša wo pelong ya bona, le go re, “Ke a bona bjale nako ya bofelo, leswao la kota. Gomme ke a tseba re mo magahlanong, gomme seo ke se sohle se lego mabapi le. Ke be ke makala gore ka baka la eng pelo ya ka e be e le bjalo, e be e huduegile kudu mengwaga ye e sego mekacay a go feta. Ee, Morena. Ee, Morena.” A nke ba e bone.

¹⁶⁹ A nke mahlo a bona a bulwe, ba lebelela go dikologa fa le go re, “Ee, še yona, ke bona dilo tšohle tše mpe tše ke maswao.” Ke maswao a kagodimogatlhago go tloga go lenaba. Gobaneng, o dira matete a magolo. O dira dilo tše kgolo, bontši go fihla a dira

mollo go wa go tšwa legodimong. Ee, ba na le disatalaete gohle go dikologa lefase. Gomme—gomme ke dilo tša tlhago, lenaba le tliša maswao a mollo; le se sengwe le se sengwe gape, dikgwedi tša maaka le matšatši a maaka, le dilo tšohle tše dingwe tša bona.

¹⁷⁰ Eupša, Modimo, O rile go tla ba le maswao godimo kua, le wona, ao ba ka se a kwešišego, gomme re phela go a bona. Ke leboga kudu, Morena, ke leboga kudu bakeng sa Kriste. Gomme ke a rapela gore O tla dira, ka mohlanka wa Gago wa go kokobela... Megokgo ya go sokologa marameng a ka, Modimo, ke neela bophelo bja ka go Wena, ka boswa lehono. Gomme a O ka nthuša, morategi Modimo, go dula ka go kokobela, le go boloka go ntikologa banna ba go kokobela ba ba tla Go direlago, morategi Modimo, gomme ba tla dira modiro wa Modimo go fihlela, Jesu, O lesa lehu le ntokolla go tšwa go tabarenekele ye ya kgobogo. Gomme ka gona, Tate, ke nyaka go ba le Wena.

¹⁷¹ Šegofatša kereke ye nnyane ye ya go ratega. Modimo, šegofatša modiša wa rena wa go ratega fa, Ngwanešu Neville wa rena, mogwera morategi wa rena yo a emego mo ge eba go a tonya goba go fiša, ge eba go ya ga bonolo goba go tia, gomme o sa tteleima Ebangedi ye ya go se otswafatšwe ya Morena Jesu. Modimo, mo šegofatše le mosadi wa gagwe yo monnyane le bana. O Modimo, a nke a tshume Ebangedi ka dipelong tša batho, go fihla Jesu a etla. Mo šegofatše. Modimo mo fe maatla a magolo. Re a mo rata le go tseba ke monna wa go kokobela le mediro bakeng sa Gago. Gomme ke a mo leboga, Morena, go mo tlogela ka le lennyane le—le lennyane lešaka la dinku mo, le nkilego ka ba le lona ka mo. Gomme, Modimo, ke no rapela gore O tla mo thuša go tliša dinku tše dingwe tše dintši ka šakeng. E fe.

¹⁷² Dira seo go modiredi yo mongwe le yo mongwe a lego gona. Gomme e sego feela mo, Morena, eupša go kgabola ntle lefase, ka gore re a tseba letšatši le a hloka. Maswao a mo. Diabolo o ile go dikologa, bjalo ka tau ye e rorago, a phara ka maaka, le dikekišo, le, eupša, Modimo, O phagamišetša seemo godimo kgahlanong le yona, ka Moya wo Mokgethwa, gomme re a leboga. Bjale re šegofatše, mmogo.

¹⁷³ Gomme lehono, Tate, ge re eya go rapelela balwetši, a nke O tlotše modiredi yo mongwe le yo mongwe ka fa, ka boswa. E fe, Morena. Gomme a nke modumedi yo mongwe le yo mongwe ka mo a tlotšwe, gomme motho yo mongwe le yo mongwe a babjago a tlotšwe. Gomme a nke, ge re eya ntle fa, a nke motho yo mongwe le yo mongwe a dirwe go tia gabotse, le letago la Modimo godimo ga disoulo tša rena, ge re rapela Leineng la Jesu. Amene.

Tumelo ya ka e lebelela go Wena,
Wena Kwana ya Khalibari,
O Mophološi...

A re phagamišeng diatla tša rena ge re opela.

. . . Mokgethwa;
 Bjale nkwe ge ke rapela,
 Tloša dibe tša ka tšohle,
 O ntumelele go tloga letšatši le
 Go ba wa Gago ka moka!

Ka go nokologa bjale, *Dula Le Nna.*

¹⁷⁴ Ka dihlogo tša rena di inamišitšwe, re neela dilo tšohle go Wena; renabeng, maphelo a rena, tirelo ya rena. Re šomiše bohle, Morena. A nke yo mongwe le yo mongwe a ye a šušumeditšwe, lehono. A nke le e be letšatši leo re tla le elelwago botelele, ka lebaka la Moya wo Mokgethwa o nago le rena le go re šegofatša.

¹⁷⁵ Bjale efa go balwetši, Morena, ditlhoko tša bona lehono. E fe, Morena. Eba le kgaogelo, Tate. Dira se bakeng sa Jesu, re a rapela.

¹⁷⁶ Gomme bjale, Morutiši yo mogolo, O re rutile bohle, letšatši le lengwe, O rutile barutiwa ba Gago, bjalo ka mohlala go rena bohle, O rile, “Ka morago ga mokgwa wo rapelang.”

Tate wa rena Yo a lego Legodimong, Leina la gago a le kgethege.

Mmušo wa Gago a o tle. Thato ya Gago a e dirwe lefaseng, bjalo ka ge e dirwa Legodimong.

Re fe letšatši le borotho bja rena bja tšatši ka tšatši.

Gomme o re lebalele dikarogo tša rena, bjalo ka ge re lebalela bao ba dirago dikarogo kgahlanong le rena.

Gomme se re iše molekong, eupša re phološe go tšwa bobeng. Gobane Mmušo ke wa Gago, le maatla, le letago, go ya go ile. Amene.

¹⁷⁷ *Dumela Feelaa*, ge o rata, kgaetšedi.

¹⁷⁸ Ke ba bakae ba swanetšego go rapelelwa? A re ka bona diatla tša lena, bao ba nyakago go rapelelwa? Ke a makala ge eba le tla lokologana, godimo ka go lehlakore le letona *fa*, bontši ka fao le kgonago. Gomme bao ka lehlakoreng *le*, mothalo go ya bogare bja mokgoba *mo*, ge le ka kgonaa. Bao ka mokgobeng *wo*, lokologanang godimo ka lehlakoreng *le*. Gomme lena ka go mokgoba wa gare, *mo*. Go lokile. A re opeleng bjale.

Dumela feelaa, dumela feelaa,
 Dilo tšohle di a kgonega, dumela feelaa;
 Dumela feelaa, dumela feelaa,
 Dilo tšohle di a kgonega, dumela feelaa.

¹⁷⁹ Ke ba bakae ba kilego ba ba ka kopanong pele, tirelo ya phodišo. A re boneng seatla sa gago. Lena bohle le dirile. Oo, nna! Mokgonatšohle, wa mehlolo!

¹⁸⁰ Ke a makala. Bjale feela se sengwe se tla go nna, seo se fetola monagano wa ka ka se sengwe gonabjale. Ke bona mothalo wo wa thapelo ka kgonagalo o tla re tšea go fihla ka iri ya boraro gape, go tšwa go yona.

¹⁸¹ Ngwanešu Tom Merrideth o kae? A o sa le mo? Ngwanešu Junior Jackson? Bobedi bja bona, badiredi. Lena badiredi, bareri ba Ebangedi, bao le dumelago go phodišo Kgethwa, etlang fa feela motsotsotso.

. . . dumela feela.

Dumela feela, dumela feela,
Dilo tšohle di a kgonega, dumela feela;
Dumela feela, dumela feela,
Dilo tšohle di a kgonega, feela . . .

¹⁸² Nakwana feela, ke nyaka go le botšiša se sengwe. Ka gore, Ngwanešu Cox, le ba bantši ba lena mo ba a tseba gore karolo ye ya beke, ke le boditše ke be ke sa nyake tirelo ya phodišo, mosong wo, mo. Eupša ke bile le bagwera tsoko go mpitša, go hlompheng eng? Ngwanešu Hall o be a swere tsošeletšo, tirelo ya phodišo, godimo ka ga Ngwanešu Durban. Gomme Ngwanešu Hall o be a le godimo kua. Ke dirile tsebišo beke ya go feta, ya ditirelo tša gagwe. Ke ka baka leo ke—ke dirilego tsebišo yela, gobane ke ngwanešu wa rena, gomme o swere tirelo. Gomme . . .

¹⁸³ [Yo mongwe o bolela le Ngwanešu Branham—Mor.] Gobaneng, gobaneng, Ngwanešu Hall, a ke wena, Ngwanešu Hall, fao? Ngwanešu Hall o na le rena. Go lokile. Ngwanešu Hall, a o a tswalela, bošegong bjo, ngwanešu? Ke a bona. Ngwanešu Durban o mošola wa noka. Ba ne tirelo ya phodišo. Ke tseba Ngwanešu Hall, ngwanešu yo mokaone, mohlanka yo a tloditšwego wa Morena.

¹⁸⁴ Ke a makala, Ngwanešu Hall, gabotse, ge go ka be go se go kgopele bontši kudu, a o ka ema le rena, mosong wo, bakeng sa thapelo, bakeng sa balwetši, le rena? Ke hloya go bea modiredi, yo a bego a rapela ka mokgwa woo; ge o ka no ema mo, gomme bogona bja gago le rena, go—go rapelela balwetši.

¹⁸⁵ A re reng, “Lebogang Morena ka Ngwanešu Hall.” [Phuthego e re, “Lebogang Morena ka Ngwanešu Hall.”—Mor.] O na le tirelo godimo ka ga Ngwanešu Durban, beke ye. Bontši bja lena le e tsenetše, ntle le pelaelo. Gomme ke ithutile go rata Ngwanešu Hall ge a be a le fa nako ye nngwe. Gomme ka gona ka go ba le katlego ye ntši kudu, Morena o mo file katlego ye kgolo go rapeleleng balwetši. Gomme ke a dumela o be a le tikologong gannyane, a rapelela balwetši. Gomme, Ngwanešu Hall, a o ka nyaka go bolela lentšu go setšhaba, e ka ba eng monaganong wa gago? Go lokile, mohlomphegi. O bile le kopano ye botse beke ye, Ngwanešu Hall? Re thabile kudu go wena go ba mo.

¹⁸⁶ Gomme bjale lena batho ba go babja. . . E sego feela gore, badiredi ba mo, bohole re beilwe mothalong mmogo bjalo ka

sebo, re dumela go Bokgonatšohle. Re dumela gore Modimo ramaatlakamoka, ka go matšatši a a mafelelo, a go dira mehlolo, le go fodiša balwetši le batlaišwa, gomme re bona bokgonatšohle bja Gagwe bo dira feela tlwa se A rilego O tla se dira. Re mo go le rapelela mosong wo. Gomme ke a dumela gore Modimo o tla e dira.

¹⁸⁷ Gomme nakwana feela. [Yo mongwe o bolela le Ngwanešu Branham—Mor.] Ngwanešu Jack Oakey, mo go tšwa Bogareng bja Tsošeletšo? Gobaneng, re tla thaba go ba le wena, Ngwanešu Jack Oakey, kae kapa kae o lego. Gomme ngwanešu wa ka o sa tšwa go tla a mpotša ka Ngwanešu Jack Oakey. A o ka moagong? Gona, gobaneng, o—o tla thwi godimo le rena, Ngwanešu Oakey, e ka ba kae o lego.

¹⁸⁸ Gomme badiredi ba bangwe, gobaneng, re no thabela go ba le lena. Ge le dumela go phodišo, etlang fa. Ye ke thomo ya rena go dira dilo tše, le go rapelela balwetši le batlaišwa. Yeo ke ye maatla ye kaone.

¹⁸⁹ Ngwanešu Oakey, moo... A yola ke Ngwanešu Oakey a emego fa le wena? Aowa. Oakey, Oakey, ke bjalo... Huh? O reng? [Yo mongwe o bolela le Ngwanešu Branham—Mor.] Go lokile, moebangedi. E ka ba mang o lego, etla pele, modiredi ngwanešu, thwi godimo fa, kopanelo. Oo, nna! Seo se a makatša. Etla thwi pele. Leina la gago o mang, ngwanešu? [Ngwanešu o re, “Ngwanešu Jack Arkly.”] Ngwanešu Jack Arkly. Re thakgetše go ba le wena, Ngwanešu Jack, le rena.

¹⁹⁰ Bjale, seo e no ba gabotse le bothakga. Lena bohle le ka šikinya diatla tša lena seng, ge le etla go bapa fale, le go tsebana.

¹⁹¹ Gomme bjale sese se Morena a se rometšego go rena, mosong wo, go rapelela batho ba, gomme ba bangwe ba bona ka seemong sa go hwa. Mohumagadi a eme thwi morago fale, a rwele kefa ye tšhwieu, o ne kankere. Go ne monna o eme fa ka pele ga ka, o ne kankere. Gomme go na le tše ntši—tše ntši dilo tša go fapano. Mo go robetše mohumagadi mo ka kokoilane ya go robega ye e sa folego. Re na le, oo, dilo tše ntši—tše ntši mo. Mohumagadi yo a dutšego mo ka atheraithisi, ka setulong sa bagolofadi. O dumela gore Modimo o ya go mo dira a loke. Re dumela seo, le rena.

¹⁹² Bjale, baena, selo se nnoši re ka se dirago ke go rapela. A yeo ke nnete? Go no rapela. Ke no ba ke fokola kudu lehono go ya ka go seo...?... Le a bona, ke no... Ke rerile thata.

Kafao, bjale a re inamišeng dihlogo tša rena.

¹⁹³ Ke ya go kgopela baněšu, ge yo mongwe le yo mongwe a ka tla. Gomme a re direle lefelo thwi tlase mo ka pele, mo, gore re kgone go rapelela balwetši ba. Ke tla tla thwi fase le lena. Gomme re ya go rapelela balwetši, le go fetiša ba bangwe go kgabola, le go rapelela yo mongwe le yo mongwe. Gomme yo mongwe le yo mongwe wa rena re bea diatla go balwetši le go dumela gore Modimo o ya go ba dira ba welwe ke maruru. Le a e

dumela, baena? Go reng ka yona, Ngwanešu Hall, o dumela seo ka pelo ya gago yohle? Go lokile. E ya go direga.

¹⁹⁴ A re bjale, ge le ka dira, go ngwegela ntle, tlase lehlakoreng, ditepisi fao, baena ba ka, ge le rata. Le go le dira mothalo wo monnyane thwi go bapa fale bjale. Ke tla thoma—thoma tlase fa, gomme re tla rapela.

¹⁹⁵ Gomme re nyaka kereke yohle go tšoena le rena. A le tla e dira, bagwera, ge re rapelela balwetši ba?

¹⁹⁶ Bjale, lena batho, go ne baebangedi ba bakaone fa, le badiredi ba masolo a phodišo, bao ba lego mo go rapela le lena mosong wo. Gomme re thabile go fa tirelo bjale go rapelela balwetši.

A re rapeleng gatee gape.

¹⁹⁷ Tate, ka Leina la Jesu, re amogelete bjale. Re kgopela Moya wo Mokgethwa go tla godimo ga rena le go re šegofatša, le go re fa seo re se kgopelago lehono. A nke maatla a magolo a mokgonatšohle a Modimo a sepeleka gare godimo ga rena feela bjale. Gomme a nke Letago la Shekinah, O Modimo, leo le dutšego ka tlase ga diphego tša go swarana, a nke Le tle ka tlase ga matsogo a swaranego a sefapano, le go tla godimo ga rena, lehono, Morena, ge re etla re letetše Maatla a Modimo. Re rapela tšhegofatšo ye go batho. A nke go se be le o tee, go se o tee, a šitwago, eupša a nke yo mongwe le yo mongwe a fole. Leineng la Jesu Kriste. Amene.

¹⁹⁸ Bjale, Ngwanešu Neville, ge o ka hwetša oli gomme wa ema mo leotong lefelo fa bjale, ge re thoma. A re rapeleleng mohumagadi godimo ga khote, pele, morago tlase ka mokgwa woo, morago re gatela thwi morago gomme re dumelele ba bangwe go tla go kgabola. Go lokile. Morena a šegofatše bjale.

Yo mongwe le yo mongwe ka thapeleng bjale. Ebang ka go rapela bjale.

Golokile, baena, fa. A re rapeleleng phodišo ya gagwe.

¹⁹⁹ Tate wa rena wa Magodimong, kgaetšedi wa rena yo a robetšego mo, o tla ba ka go khote ye bophelo bja gagwe ka moka. Eupša, re a dumela, Tate, lehono, ge a tlide mo go rapelelwa. Gomme rena, baena ba Gago, bao re dumelago gore O tla re direla se, ka go kokobela re a rapela le go kgopela Leineng la Jesu, gore O tla tšeа seemo se—se go tloga go yena. Efa khalesiamo bakeng sa leoto lela, leoto la gagwe, goba le le robegilego. Gomme ke a rapela, a dirwe go loka, gomme a ke a kgone go sepela go dikologa, go tagafatša Modimo. Ka diatla godimo ga gagwe, re kgopela tšhegofatšo ye Leineng la Jesu Kriste. Amene.

²⁰⁰ Tate Modimo, ge re eme fa mo aletareng mosong wo; le yo, kgaetšedi wa rena wa lekhala. Go tsebeng gore letšatši le lengwe, ge Jesu a be a rwela sefapano, godimo Khalibari, ka Gologotha, O wetše ka tlase ga morwalo wa sefapano. Gomme fao be go le monna wa lekhala a tla mmogo, gomme a se

rwala; a se topa, o Mo thušitše go se rwala, a sepela ka go dikgato tša madi tša sefapano. Šo yo mongwe wa barwedi ba gagwe o dutše mo lehono, Morena, yo a rathilwego, a babja, o dutše ka setulong se lehono. Gomme a ka be a bile bophelo bja gagwe bjohle, ge O ka be o se ne kgaogelo, Morena, mošola ga ngaka. Eupša ga se nke . . . ? . . . Gomme re a rapela . . . ? . . . Ka Leina la Jesu, gore leoto la gago le fole. Gomme a nke a sepele le go dirwa go felela ka go felela, Leineng la Jesu Kriste. Amene.

²⁰¹ Bjale, wena, a o ikwela go fapana . . . ? . . . goba aowa? Etla mo. E no thoma. Phagamišetsa maoto a gago godimo, goba e ka ba eng o nyakago. Gona o nyaka go ba . . . ? . . . o re, “Ke emeletše gomme ke sepetše go kgabola moago.” . . . ? . . .

²⁰² Tate wa rena wa Magodimong, ngwanešu wa ka, mogwera wa ka, modirišani wa ka yo ke mo tsebilego botelele bjalo, o mpiditše mogaleng, bošego bjo bongwe, “Go hwetša, dingaka di mpotša gore ga go kholofelo.” Maatla a kankere, ao a tla tšeago bophelo bja gagwe.

²⁰³ Morategi Modimo, O tseba pelo ya monna. Ge fao go le selo se se itšege se se lego kgahlanong le thato ya Gago, lehono, eng kapa eng, a nke bjale e lebalelwé. A nke, mosong wo, yona iri ye, Ngwanešu wa ka Carl o tla go Wena, gomme o fa ka go felela, bophelo bjo bo neetšwego . . . ? . . .

²⁰⁴ Modimo, ge O . . . Dingaka ga di kgone go dira selo go dilo tše. Eupša Wena o Yena a nnoši Yo a kgonago go ntšhetše bophelo bjola ka ntle ga fao, wa dira go phera fao . . . ? . . .

²⁰⁵ Gomme Wena Yo a dulago bokgethweng, Wena Yo a dulago ka go . . . Wena o Letago la Shekinah. Wena o mokgonatšohle. Re a rapela gore O tla e dira bošegong bjo, bakeng sa bopaki bakeng sa Lentšu la Gago, la maatla a Jesu yo a tsogilego. Re ahlola kankere, godimo . . . ? . . .

²⁰⁶ Tate Modimo, bjale re kgopela bakeng sa kgaetšedi wa rena, go kgopela gore a hlakodišwe go . . . ? . . . marato, le go ya pele. Gomme bjale, Morena, go rapela ka tlhokofalo, eupša O tla dira, Kriste wa go swana . . . ? . . . Ke bea diatla godimo ga gagwe, Morena! . . . ? . . .

²⁰⁷ Morategi Modimo, re bea diatla godimo ga yo, ngwanešu wa rena, yo a emego pele ga ka letšatši ka letšatši, thapelo ya gagwe e e kgabagantše, moyo wa gagwe o e kgabagantše, gomme o lebeletše go leba—go leba bodikelatšatši. O Modimo, Abraham o dirile bjalo, mengwaga ye lekgolo ka bokgale; o boletše le yena gomme wa re, “Ke nna El-Shaddai.” O Modimo, Wena o mokgonatšohle. Gomme re a rapela, Modimo, gore O tla dira mohlololo le go fodiša yo, ngwanešu wa rena, Leineng la Jesu. Amene. Amene. Tate . . . ? . . .

²⁰⁸ Tatewešo wa rena wa Legodimong, bjalo ka badiredi ba ba tloditšwego ba Ebangedi, re ema lehono . . . ? . . . Bjalo ka ge phuthego e kopane ka matšatšing a a fetilego, gomme ka morago

ga Pentecost ba tlie mmogo le go rapela. Gomme, Tate, re phuthega mmogo, bjalo ka banešu ba ba dumelago, le batho bohle. Gomme re kgopetše gore batho ba kopana; ba dirile. Re kgopela gore o tloga go lesogana le, lehono. Go ka no se tsoge go go tshwenya gape. O a tseba...?...

²⁰⁹ Tate, re Bea diatla godimo ga kgaetšedi wa rena, le go kgopela seo, Leineng la Jesu, gore O tla ahlola bolwetsi bjo bja mmele wa gagwe, le go mo dira a thakgafale go felele. Ge a feta go theoga mothalo wo wa banna, a gafela bophelo bja gagwe go Wena, Morena, a dumela; bobiletšwantle, bophelo bjo bo arogantšwego, go tloga go dilo tša lefase, le tša go tonya, dikereke tše fomale, go tla ka go Ebangedi ya kgonthe. Re kgopela Leineng la Jesu, Yo a fago go ya ka se re Mo kgopetšego. Amene.

²¹⁰ Leineng la Jesu, re Bea sakatuku se, Morena, go Wena, gomme re kgopela tokologo ya morwedi wa gagwe.

²¹¹ Tate, re Bea diatla godimo ga kgaetšedi wa rena, ge a eya go kgabola mothalo wo wa thapelo, re kgopela gore O tla mo lokolla go tšwa go bolwetsi bjo ka mmeleng wa gagwe. Ge re mo fetiša go kgabola mo, go Bea diatla godimo ga gagwe, Morena, hlwekiša bobedi mpho le...?... Morena. E fe. Leineng la Jesu, re kgopela phodišo ya gagwe. Amene.

²¹² Tate Modimo, re Bea diatla godimo ga kgaetšedi wa rena, go e kgopela Leineng la Jesu. Ge a feta go kgabola mothalo wo wa banna...?...

²¹³ Tate Modimo, re Bea diatla godimo ga ngwana wa borena yo monnyane, le go e kgopela Leineng la Jesu, gore O tla fodiša e ka ba mang...?...

²¹⁴ Tate Modimo, re Bea diatla godimo ga kgaetšedi wa rena, le go e kgopela, Leineng la Jesu, gore O fodiša mmele wa gagwe le go mo dira a felele. E fe.

²¹⁵ Tate Modimo, re Bea diatla godimo ga ngwana wa bo rena, le go e kgopela Leineng la Jesu, gore O tla fodiša mmele wo. Gomme ge a feta go theoga mothalo wo wa badiredi, ke a rapela, Modimo, gore Letago la Shekinah le tla...?...

²¹⁶ Nka Bea diatla godimo ga wa rena morategi, ngwanešu morategi, le go kgopela, ge a feta go kgabola fa, gore o tla ya go kgabola yela ya go hlwekišwa Oli, yeo a lego ka thapelang bakeng sa yona.

²¹⁷ Tate, ke Bea diatla godimo ga kgaetšedi, le go kgopela, ka Leina la Jesu Kriste, gore O tla mo fodiša le go mo dira a felele.

²¹⁸ Tate Modimo, re Bea diatla godimo ga kgaetšedi wa rena...?... ge re Bea diatla godimo ga gagwe, Leineng la Jesu, Morwa wa Gago. Amene.

²¹⁹ Tate Modimo, re Bea diatla godimo ga ngwana wa bo rena...?... malwetsi, Morena.

²²⁰ Ba na le tumelo bjale, ge ba feta kgauswi. Ba tloditšwe ka oli, bjalo ka ge Lentšu le rutilwe.

Leineng la Jesu . . . ? . . .

²²¹ Tate Modimo, re bea diatla go kgaetšedi wa rena, Morena, ge a eya go theoga mothalo wo. Ka . . . ? . . . tlhologelo ya pelo ya gagwe . . . ? . . .

²²² Tate Modimo, re bea diatla go ngwanešu wa rena, le go kgopelela phodišo ya gagwe.

²²³ [Mothalo wa thapelo o tšwelapele lebaka la metsotso ye meraro le metsotsvana ye lesometlhano, a mantši a mantšu a Ngwanešu Branham ga a hlaologanyege—Mor.]

²²⁴ A le diregile go lemoga, go tlaba? Ke rerile mosong wo, go “ditsela tša magahlano.” Lebelelang magahlano fa . . . ? . . . mothalo wo wa batho.

²²⁵ [Mothalo wa thapelo o tšwelapele lebaka la metsotso ye tshela—Mor.]

²²⁶ O Modimo, Mokgonatšohle! E fe, Morena, gore Moya le maatla di tla tla godimo ga kgaetšedi wa rena, go mo dira a welwe ke maruru ka go felelela. Re a rapela, Leineng la Jesu, ge a feta go theoga badiredi ba, a nke a be go felela bošegong bjo. Amene.

²²⁷ [Mothalo wa thapelo o tšwelapele bakeng sa metsotsvana ye masomenne tlhano—Mor.]

²²⁸ Tate, Leineng la Jesu, re rapela godimo ga sakatuku se, go swana le ge go tšerwe go tšwa mmeleng wa Paulo. Gomme ke bitša . . . ? . . . Rapela, Modimo, gore a dirwe go loka, mosong wo, Leineng la Jesu. Amene.

²²⁹ Morategi morategi, mogwera, Leineng . . . Letang, mohumagadi šo o tla go rapelelwa. Ya, etlang thwi godimo fa. Lena baena . . .

²³⁰ Morategi wa rena Tate wa Magodimong, re bea diatla godimo ga kgaetšedi wa rena. Gomme re mo leboga kudu go ba bokaonana. A nke tumelo ya gagwe e se ke ya dikadika bjale. Gomme . . . ? . . . Leineng la Jesu Kriste . . . ? . . .

²³¹ Bjale re dirile eng? Se Morena a se boletšego. A ke nnete?

²³² Re thabile go ba le baeng ba rena, badiredi baena le rena, bagwera ba bohle. E reng, “Amene,” lena bohole bao . . . [Phuthego e re, “Amene.”—Mor.] Gabotse, ka kgonthle amogetšwe morago, baena ba ka ba go ratega, go ba le rena. Gomme lehono, re no ya go e ka ba go e dira, go—go tšwela ntle ka nako. Re thakgetše le be le le fa. Gomme, baena ba ka, ke a le rapelela kgafetšakgafetša. Gomme lena nthapedišeng, e ka ba kae ū yago, gomme le rapele bjale ge ke eya ntle tšhemong gape. Gomme a nke ditsela tša rena di kgabaganye, nako ka morago ga nako.

²³³ Elelwang, Ngwanešu Oakey, nka no . . . Ke diregile go elelwa baratwa ba gagwe ntle kua ka—ka California. A yoo ke Ngk.

Oakey, wa . . . ? [Ngwanešu Oakey o re, “Aowa.”—Mor.] Oo, Oakey yo mongwe. Ee, mohlomphegi. Gomme ke—gomme ke a tseba go na le bontši bja boOakey ntle kua. Ke be ke no se tsebe ke ofe a bego a kgokagane le yena. Ke tseba Ngk. Oakey, ngaka ya meno, le a tseba. Gomme ka gona, gomme—gomme kafao . . . A o leloko le yena, le wena? [“Ke motswalake.”] Motswala wa gago. Gabotse, seo se gabotse ka maatla. Monna yo mokaone!

²³⁴ Bjale, re dirile eng go lena batho fa? Sese se se lego. Re ka se eme fa le go bea diatla go balwetši ntle le ge re e dumetše. Re bone batho ka rena lehono, ba dutše ka go batheeletši ba thwi fa; batho ba ne kankere, ba foufetše, ba golofetše. Feela a nke ke le bontšhe se sengwe, ge go na le basetsebje fa. Ke ba bakae mo ba ba fodištšwego, ka tsela yeo, ya Modimo? A re boneng diatla tša lena di eya godimo. Seo ke, sefofu, dikankere, le se sengwe le se sengwe, le a bona. Le a bona? O tla go direla go swana. Le a bona? Bjale, re a e dira, bjalo ka ye: re dumela thapelo ya rena.

²³⁵ Gomme bjale go ya go tswaleleng, pele re neela tirelo go Ngwanešu Neville wa rena, elelwang ditirelo bošegong bjo. Gomme bošegong bjo, ge go na le e ka ba mang yoo—yoo o mo tsebago, moratwa yoo a sego a tsena mosong wo go rapelelwa, Ngwanešu Hall, mo, o ka ga Ngwanešu Durban. Gomme yeo e tla ba . . . Gomme a tšupabodulo ke eng, ngwanešu? [Ngwanešu o re, “Ga ke tsebe tšupabodulo.”—Mor.] Eng? [Ngwanešu yo mongwe o re, “Ya lesomešupa le Market.”] Ya lesomešupa le Market, ka Louisville, moo ba nago le lesolo la phodišo. Gomme leo e bile lona lebaka leo ke bego ke lewa ke hlong mabapi le go ba le tirelo. Ke—ke—ke hloya go ya ka lefelong moo yo mongwe a swerego le—le—le lesolo la phodišo, gomme yo mongwe a thoma letee. Gomme ke ka lebaka leo ke boletšego se ke se dirilego ka e sego . . . ka ditirelo mosong wo, ke tlhomphong ya Ngwanešu Hall ka ga Ngwanešu Durban, gobane bobedi ke bagwera barategi ba ka.

²³⁶ Gomme ga re nyake lesolo la phodišo le eya godimo fa, ge Ngwanešu Hall a ne le lengwe le eya godimo fale. Ke na le nnete ya seo. Gomme, ka fao, re a mo rata.

²³⁷ Gomme bjale, Ngwanešu Oakey, o go kae, ngwanešu? [Ngwanešu Oakey o re, “Masomenne masometharo West Market.”—Mor.] Masomenne masometharo West Market. Ngwanešu yo mongwe le wena fao, le mmogo? Go lokile. Bjale yeo ke ka masometharo . . . masomenne . . . [“Masomenne masometharo West Market.”] Masomenne masometharo, masomenne masometharo West Market, Louisville, lesolo le lengwe. Gomme kafao ke botelele gakaakang o yago go ba fale, Ngwanešu Oakey? [“Go rera fale beke yohle.”] Beke ye ya go latela yohle. Seo se gabotse. Bjale, lena bohle le babjago, masometharo . . . masomenne, West Market. [Phuthego e re, “Masomenne masometharo West Market.”] Ya. Masomenne pele ka West Market. Go lokile. Yeo e kaone. Bjale a go ne . . .

²³⁸ Ke bone badiredi ba mmalwa gape. Ngwanešu fa, o ne lesolo le eya felotsoko, mohlomphegi? Aowa. Aowa. Ya. Gabotse, seo se lokile kudu. Seo se lokile.

²³⁹ Gomme ngwanešu yo mo ke mo—mo moromiwa go Mojuda, ke a dumela, a ga se yena? Gomme moromiwa go Bajuda. Ke nagana o phela ka New Albany. Gomme kafao re thabile kudu go ba . . .

²⁴⁰ A ke fošitše o tee? A go na le yo mongwe gape felotsoko? Ke—ke a holofela ga se ka dira; ga ke re go dira. Nnete, Ngwanešu Junior Jackson, o tseba mo a lego ka New Albany.

²⁴¹ Ngwanešu Tom Merrideth o ne kgašo. A o ne kereke, Ngwanešu Merrideth? Ga go kereke. E no ba kgašo. O e tsebišitše, metsotso e se mekae ya go feta.

²⁴² Gomme Ngwanešu Neville o na le tirelo fa go lena batho fa, go dikologa fa, go bošegong bjo, le bakeng sa Laboraro le le tlago le, le go kgabola beke. Gomme ditirelo tša gagwe—tša gagwe, kgašo ya gagwe, e ka Mokibelo mosong. Go lokile.

²⁴³ Yo mongwe le yo mongwe o ikwela gabotse? E reng, “Amene.” [Phuthego e re, “Amene.”—Mor.] Go lokile, bagwera. Go go dira o nyake go tšoena se sebotse, sehlopha sa bareri ba go thaba, le go ya go rera Ebangedi, le go rapelela balwetši, le bona. Modimo a e fe go lena, bagwera.

²⁴⁴ Lesogana fale yoo a ntšhitšwego mantlhekgeng feela e se kgale, o be a na le kokoilane ya seripa sa tshipi, e ile go otlologa go kgabola lehlakore la gagwe, ya swiela go mo kgabola, gomme ya ema ntle lehlakoreng le lengwe, ka mokgwa woo. Wa go ratega, mme wa go rapela! Modimo o mo šegetše morero tsoko. Ge e sa le a mpoditše, ke naganne . . . Mosong wo, ke kopane le yena ge ke etla ka holong. O šikintše seatla sa ka. Ke rile, “A ga se wena mošemane?”

²⁴⁵ O rile, “Ee, mohlomphegi.” O rile, “Ke bileditše bodireding.” Modimo eba le kgaogelo! Bjale, baena ba ka ba go ratega . . . Feel a lesogana, le dutše fale ka jase ye tsotho godimo. A nke Modimo a fe gore o tla ba seetša se se laumago, ge re sa le magahlanong a tsela, morwa. Gomme, rera Ebangedi, rera Ebangedi ya go tlala, rera Lentšu lohle la Modimo, gomme o se ke wa itsimeletša ka selo. Ema thwi fale mo lefelong la mošomo. Modimo o tla dira mohlabani yo mogolo go tšwa go wena.

Bjale, a re rapeleng thapelo e tee ye ya mafelelo bjale bakeng sa balwetši.

²⁴⁶ Tatewešo wa Legodimong, re a Go leboga bakeng sa lesogana le, mosong wo, le rena, Morena. Gomme ge a dutše fale mosong wo, a theeditše Lentšu, le go boneng badiredi ba ka dipelo tša bona di lauma, ge ba beile diatla go balwetši, ge ba fetile go kgabola mothalo wo. Go boneng mabopaki fale, a batho ba phagamiša diatla tša bona, bao ba fodišitšwego ka kankere, le

bofofu, le difoa le dimuma, le digole. Ke—ke tlhohlo. Gomme re lebelela fase Lentšu le la kgale la go šegofala, gomme Le rile matšatši a a tla ba mo, gomme re eme mo. Re bona Modimo mokgonatšohle ka letsogo la Gagwe le otlollogile, le maswao le matete a etla. Re kwa modumo wa bontši bja pula ka moyeng. Re a tseba gore re ka go letšatši le legolo la pula ya mafelelo.

²⁴⁷ Ge, Sathane o tla tlengwa le go lahlelwa ka mole teng, a tlemilwe ke ketane ya maemo, gore a ka se kgone go tšwela ntle le go fora ditšhaba gape. Gomme mengwaga ye sekete, pušo ya Mileniamo, e tla direga lefaseng ge re sa tagafatša Morena wa rena Jesu, le go Mmoboela; go Mo rweša mphaphahlogo, “Kgoši ya dikgoši, le Morena wa marena.”

²⁴⁸ Lefase le la kgale la sebe le tla phatloga go bulega, a mangwe a matšatši a, ge maatla a athomo a lokolotšwe, gomme dihaetrotšene di tla dira. Gomme lewatle le lengwe le le lengwe, le meetse, a tla . . . Lewatle le tla lla go fihla le oma. O Modimo! Gomme letšatši le tla šitwa go phadima. Gomme ngwedi o ka se fe seetša sa ona. Gomme dinaledi tša legodimo di tla wa boka mohlare wa mogo wo o šikinywago ke phefo ye maatla. Gomme banna ba tla llela maswika le dithaba. Gomme bophelo bjo bonnyane bjo bo ya go reng nako yeo?

²⁴⁹ Gona bahu ka go Kriste ba tla tsoga. Oo, a paradeisi! Ditšhaba di ka se emiše godimo tšoša kgahlanong le setšhaba, gape. Le bile re ka se tsoge ra ba le mothalo wa thapelo go balwetši.

²⁵⁰ Lehono ke letšatši la phološo. Gomme, Tate, re tlišitše batho ba go Wena. Gomme re kgopetše Wena, Leineng la Jesu, Yo a boletšego se, “Kgopelang Tate eng kapa eng Leineng la Ka, e tla dirwa.” Bjale, rena, ga se thapelo ya rena ye re nago le tumelo ka go yona. Ke taelo ya Gagwe, re na le tumelo ka go yona. “Kgopelang Tate eng kapa eng Leineng la Ka, Ke tla e dira.”

²⁵¹ Bjale, Sathane, wena yo a bilego yo mobe kudu, gomme o tlemile batho ba, le go bea lehu godimo ga ba bantši ba bona, le go ba golofatša, le go ba foufatša, le go dira mehuta yohle ya bobo go bona, o fentšwe. O fentšwe, gobane re dirile feela se Jesu a rilego dirang. Kagona, tumelo ya rena e a lebelela bjale gomme e re go wena, “Tlogela batho. Etšwa go bona, ka Leina la Jesu! . . . ? . . . Gomme a nke yo mongwe le yo mongwe a fole, ka Leina la Jesu Kriste.

Tumišang Morena! Bjale dumelang.

Ke a kgora, ke tla dira, ke a dumela;
 ke a kgora, ke tla dira, ke a dumela;
 ke a kgora, ke tla dira, ke a dumela
 Gore Jesu o a mphodiša bjale.

Ke Mo tšeа Lentšung la Gagwe;
 ke Mo tšeа Lentšung la Gagwe;
 O tliša go nna tokologo mahala,
 ke Mo tšeа Lentšung la Gagwe.

Ke a kgona, ke tla dira, ke a dumela;
 ke a kgona, ke tla dira, ke a dumela;
 ke a kgona, ke tla dira, ke a dumela
 Gore Jesu o a mphodiša bjale.

²⁵² A ga le e dumele? Ka pelo ya ka yohle! Ngwanešu Saul, o a e dumela? [Ngwanešu Saul o re, "Amene."—Mor.] A o a dumela gore Modimo o tla e dira, Ngwanešu Tony? [Ngwanešu Tony o re, "Amene."] Amene. Kgaetšedi Snyder, o a e dumela? [Kgaetšedi Snyder o re, "Amene."] Kgaetšedi, a o a e dumela? A o a e dumela, kgaetšedi?

²⁵³ "Gomme tumelo ke sebagona sela sa dilo tše di holofetšwego, bohlatse bja dilo tše di sa bonwego." Ka tumelo re bone maboto a magolo a Jeriko a ewa! Kriste o go eta pele ka tumelo. A o a e dumela? Amene. Re a e dumela. O se tsoge wa ba le moriti wa pelaelo, le neng. Modimo o tla e fetša. Mokgonatšöhle! E ne ba nnete kudu! Ke no swanelo go e latela. "Maswao a a tla latela bona ba ba dumelago." Amene. A Yena ga a makatše?

²⁵⁴ Bjale, a re ka inamiša dihlogo tša rena feels nakwana bakeng sa thapelo ya go phatlalala. Re tla kgopela . . . Go dikologa mmogo, bakeng sa nako ye nnyane ya kopanelo. Re tla kgopela ge eba Ngwanešu Neville, ge a ka tla godimo fa bjale, ge bohole re inamiša dihlogo tša rena ka go lentšu la thapelo. Ge re hama pele, ka dihlogo tša rena di inamišitswe:

Ke a kgona, ke tla dira, ke a dumela;
 ke kgona, ke tla, . . .

²⁵⁵ E nong go elelwa, O thwi ka lehlakoreng la gago. O fao go dira ya nnete. E no ikwela Maatla a Gagwe a etla ka go wena bjale. "Ke a kgona?" Nnete, o ka kgona.

Ke tla Mo tšeа Lentšung la Gagwe;
 Ke tla Mo tšeа Lentšung la Gagwe;
 O tliša go nna, tokologo mahala, (Mo Khalibari.)
 Gomme ke tla Mo tšeа Lentšung la Gagwe.

²⁵⁶ Ge re inamiša dihlogo tša rena bjale. Ngwanešu Neville, ka se o nyakago go se bolela.



MAGAHLANO A NAKO NST56-0115
(The Junction Of Time)

Molaetša wo ka Ngwanešu William Marrion Branham, setlogong o abilwe ka Seisimane ka Lamorena mosong, Janaware 15, 1956, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org